

ቅብለት በሐር ቀየሕ፡ ዝያረት ሓክመት አቅሊም



ሓክመት አቅሊም ቅብለት በሐር ቀየሕ፡ አሰይደ አስመረት አብርሃ፡ ምን ዮም 22 አሰክ 24 ጁን ዲብ ምዴርያት አፍባባት ወሽቦብ ዲብ ወዴተ ዝያረት፡ እት ፍዳልየት በራምጅ ዐማር ለረከዘ ህድግ ወዴት።

ለህድግ፡ አግደ ዲብ መትከምካም ደገጊት ግልቡብ፡ አድመኖት ከደማት ማይ መዲነት አፍባባት ልትሸቄ ለህለ ከዛናት ወሄራሩ፡ እተክምሰልሁመ ሽቦብ ሽቦብ እግል ሕፍዘት ማይ ወትርበት ውድዩ ለህለ ወራታት ለክምክም ዐለ።

አሰይደ አስመረት፡ ዲብ ምዴርያት ሽቦብ እብ ነሐር አዳም ወአብዕረት ልትሸቄ ለህለ ዐግም ወባጽሐ ለህለ ደረጃት ክም ገንሐት፡ ምስል መስኡሊን እዳራት

ደዋይሕ፡ ዐባዩ ዐድ ወልጃን ደገጊት ዲብ ወዴቱ ህድግ፡ ፋግር ለህለ ስታት ዐማር እግል ልትዐወት፡ ሽቦብ እብ ፈዛዐት ዶሩ እግል ለዓቤ ትላኬት።

እምበል እሊ ዲብ እዳረት ደዋይሕ ገብገብ ሽቄይ ለህለ ከዛን ዲብ ሰካን ናይለ ባካት እምጽኡ ለህለ መርህዮ፡ እተክምሰልሁመ ዲብ ሼክ - ሽጡር ሐድ 1000 ሄክታር እግል ልትዐመር እብ ሽቦብ ልትሸቄ ለህለ ክም ገንሐት፡ ወራታት ሕፍዘት ማይ ወትርበት ወካርያት መዳንን እብ ትወቀለት እግል ለአተላላ ትፋኔት።

እት ግልቡብ ምስል ዐባዩ ዐድ ዲብ ወዴቱ ህድግ ህዩ፡ ሰብ መቅደረት ናይለ አቅሊም እብ ሰበት እግል መትከምካም ደገጊት ለትሐሬ ድዋር፡ ከደማት

እጅትማዕየት ለልትዳሌ እተ ኣካን ለገብአት ድራሰት ተውድሕ ሀበው።

እት ምዴርያት አፍባባት ህዩ ዲብ አስቃቅ እብ መሻረከት እዳረት አቅሊም፡ አንፋር ቅዋት ድፋዕ ወሼርከት ዐዲ ሃሎ ልትሸቄ ለህለ መሐገዝ ማይ ሲቶ ሐድ 20 አልፍ ሽቦብ ወንዋይ እግል ለአርሄ ለልትሰኢ ከዛን እንዴ ጌሰት፡ ባጽሐ ለህለ ደረጃት፡ ዳብጡ ለህለ ማይ ወለህለ ተሐድያት እብ ከሰሰ ሰብ መቅደረት ለሀበው ሽርሕ ሰምዐት።

መሻርከት እብ ጀሀቶም፡ ዲብ ከደማት ማይ ሲቶ ወከህረበት ለህለ መሐገዝ ሐል እግል ልግባእ እግል፡ እዴ ጋብአት እቱ ለህሌት ዐግማት እብ ሰዳይት ማሸነሬ እግል ልሰኔ ጠልበው።

ዐንሰቡ፡ ፈሀም መጅተመዕ እት ሕማም ዐቅል ልትወቀል

ዲብ አቅሊም ዐንሰብ ፈሀም ሙጅተመዕ ዲብ መትነፊዕ ከደማት ዓፍየት እብ ዓመት፡ ዲብ መታብዐት ሕማማት ዐቅል ህዩ እብ ፍንቲት እግል ልዕቤ ጅህድ ገብእ ሀለ።

ዲብ እስብዳልየት ከረን ጌምያይ ዓፍየት ዐቅል ነርስ መብራህቱ ክፍላይ፡ ሕማም ዐቅል ክም ክሉ ለብዕድ ሕማማት መታብዐት ሰኔት ሐቆ ገብአት እሉ እግል ልትሳሬ ለቀድር ክምቱ እንዴ ሐበረ፡ ትርሃን፡ ጨቅዋ፡ ሸቀላት

ወፈርህት ምነ አጊድ እግል ልትአመር ለቀድር ክምቱ አፍሀመ።

ዲብ ዓፍየት ዐቅል ተአሲር ለቡ ሓላት ዲብለ ገብአት ደረጃት ዕምር ወጅንሰ እግል ልሳድፍ ለቀድር ክምቱ እንዴ ሐበረ ህዩ፡ እብ ለመድ ሕማም ‘ሕርያት’ ለልትበህል ለሳደፈየን አንሳት ዋልዴን ልግብእ ወሰብ ምህነት አጊድ ዲብ ቅሰም ዓፍየት ዐቅል እግል ልንድእወን ትፋኔ።

ኔርስ መብረህቱ እት ደንጎቤ፡ ዓፍየት ዐቅል ሰኔ ምህመት ሰበት ተ፡ ዲብ ዐቅል እዴ እግል ሊዴ ለቀድር ሕማማት፡ ዲብ ደረጃት ድህርት ዲብ እንቱ እግል ልትዳዌ ጅህድ ገብእ ክም ሀለ አትአመረ።

ቅሰም ዓፍየት ዐቅል እስብዳልየት ከረን፡ ዲብ ለአትቃብሎ እግል ልትዳወው ናይ ጎማት ወምክር፡ እተ ክምሰልሁመ እንዴ ረግደው እግል ልትሳረው ክድመት ለህይብ።

መሓባር፡ መድሐራት መድረሰት ፈንዩት

መድረሰት ፈንዩት መሓባር፡ መደት ክልኤ ሰነት ኣውቶማኒኒክ፡ ብነ፡ ከህረበት፡ ኤሌክትሮኒክስ፡ ዓም አሸቃል ሐጺን፡ ድራውሊት ንጃረት ውሕዳደት እብ ፍዕል ወክዘር ለአድረሰቶም 61 አንሳት ለብእቶም 199 ደረሳይ ዲብ ዮም 25 ጁን አድሐረት።

እት ዓደትለ መድሐራት ሙዲር ለመድረሰት መምህር ተስፋዝጊ አብርሀ እተ አስምዐዩ ከሊመት፡ ደረሰ ልትደሐሮ እቱ ለህለው ወክድ፡ እግል ዝያድ ዐባት ወዝያድ መቅደረት ምህንድ ለልትሐዘው እቱ ሰበት ቱ፡ ክልኤ መስኡልየት ክም ለአረፍዕ እንዴ ሐበረ፡ ደረሰ ካሰባሙ እብ ህለው አምር፡ ዲብ በራምጅ ዐማር ዶር ዐቢ እግል ለአግዱ፡ አምርም እግል

ልጠውሮ አትፋቀደ።

እት ውዛረት ተዐሊም- ሙዲር ዓም ቅሰም ተእሂል ቱክኒክ ወምህናት አሰይድ ተስፋይ ሰዩም እብ ጀሀቱ፡ ሕኩመት ኤረትርሃ ዲብ ኩልያት ወመዳርስ ምህናት ትወድዩ ለህሌት ክስኣት ረአስማል እንዴ ዘክረ፡ ለትድሐረው ራፍዓመ ለህለው መስኡልየት ክብድት እንዴ ፈሀመው እብ ዕጹፋት እግል ልሸቀው ክም ልትሰኣው ሸርሐ።

ለትድሐረው እብ ጀሀቶም፡ ለገብአት እግሎም ክስኣት ረአስማል እብ ሸቅል ወመዐጸም ክም ፈድወ አከደው።

እት ሰነት 1994 ለተአሰሰት መድረሰት ፈንዩት መሓባር፡ አሰክ እለ እት 23 ደርበት 4,908 ደረሳይ እድርሕት ህሌት።

ሰዳይት እግል ዓይላት ሹሀደ ትተላሌ

ሰካን ምዴርያት ሀበሮ፡ ከረን፡ ጸጸራት፡ ሰንዐሬ ወገልዐሎ፡ ዝያድ 422 አልፍ ነቅፈ ለትትዋገም ሰዳይት ማል ወመዋድ እግል ዓይላት ሹሀደ ወደው።

እት አቅሊም ዐንሰብ ሰካን 8 እዳራት ደዋይሕ ምዴርያት ሀበሮ እብ አፍገረው ዝያድ 136 አልፍ ፡ 62 ኩንታል እክል ወሐምስ ኩንታል ሰከር እንዴ ትዛበው እግል ዓይላት ሹሀደ ልትካፊል ዲብ ሀለ ግረህ ናይ 273 ዓይላት ተሐረሰ።

ሰካን ሐምስ እዳረት ደዋይሕ መዲነት ከረን እብ ነስኣወ መባደረት፡ ሐድ 134 አልፍ ነቅፈ እግል ዓይላት ሹሀደ ሰዳይት ወደው።

ዲብ አቅሊም ምግብ- ምዴርያት ጸጸራት ህዩ ሰካን ለአትፋገረው 60 አልፍ ነቅፈ እግል 30 ዓይላት ሹሀደ ትህዩበት።

ዲብ ምዴርያት ሰንዐሬመ፡ ሲሺል ሸቃለ ሕኩመት 56 አልፍ ነቅፈ እንዴ አፍገረው እግል ሕገዛት ዓይላት ሹሀደ ሰደው።

ዲብ አቅሊም ቅብለት በሐር

ቀያሕ-ምዴርያት ገልዐሎ ህዩ መሕበር ሸቃለ ሕኩመት 36 አልፍ ነቅፈ እግል 6 ዓይላት ሀበው።

ኤረትርዩን ሰካን ክዌት ክምሰልሁመ ኪቸነር ወተርሉ ከነደ እብ መናሰበት 20 ጁን ዲብለ ዝመወ በርናምጅ ዝክረት ሐበን፡ እማነት ሹሀደ እብ መትሰባል ሸቅል እግል ለአትምም ገለዶም ሐደሰው።

ጃልየት ኤረትርዩን ሰካን ክዌት ዲብ ዮም 23 ጁን ዲብ እብ አብረሆት ሸሚዕ፡ ወራታት ፈን ወዕሬ ፊልም ወሳይቂ ለሸምል በርናምጅ ዝክረት፡ አጀኒት እብሊ ቅየም እሊ እግል ልትረበው ዓይላት እብ ወድያሁ ለህለዩ ጸገም እብ ለትወቀለት ደረጃት እግል ልዘኩፍ መትፋቀዲ ትቀደመ።

ሰካን ኪቸነር ወተርሉ ከነደ ዲብ ወደወ ሕድ ለሸብህ በርናምጅ ህዩ፡ እግል ረሸዶት ሰንዱቅ እማነት ሹሀደ 6,664 ዶላር ከነደ ትበረወው።

ነቅፈ፡ ገበይ አቦሎ አግረዕ እብ ኬወ ትትሸቄ

እት ምዴርያት ነቅፈ- ሰካን እዳራት ደዋይሕ አበሎ፡ አግረዕ ወመዲነት ነቅፈ እተ ክምሰልሁመ ሸቃለ ለትፈናተዩ መአሰሳት ሕኩመት፡ ምን ነቅፈ አበሎ እንዴ ኬደት አሰክ አግረዕ ተሓት ወለዓል ለትደንን ገበይ ረድምየት እብ ኬወ ለአሰነ ህለው።

መሻርከት እግል ኤሪን እተ ሀበወ ሐብሬ፡ ለእብ ሐሰያት ወአወደግ ሕመድ ደቤለ ትትከሬ ገበይ፡ ዲብ ሐን ከረም ዲብ ትከርብ እግል ሐረከት ግምጫት ሰበት ዐለት ወራታቶም መሻክል ሳድፎም ክም ዐለ እንዴ ሸርሐው፡ እትሊ ወክድ ጎካ ደማን ለቡ አካናት እት ካይድ ክም ከዋ ሐዲስ ትትሸቄ ክም ህሌት እተ ሸቅል ክስኣም ለህለው ሰካን አብርሀው።

እተ ዝያድ 200 ነሐር አዳም ሻርክ እተ ለህለ ኬወ፡ እዳረት ምዴርያት ለአዳሌቱ አላት፡ ዲብ ሰርገለ ሸቅል ዶር ቀድም ክም ሀለ ለኬወ ለዝመው ሐበረው።

20 ጁን አምዕል ሹሀደ፡ እት ለትፈናተየ ድወል እብ ሕሽመት ትዘክረት

ዝክረት 20 ጁን- አምዕል ሹሀደ ኤረትርዮ፡ እት ብሪጣንያ፡ ኡጋንዳ፡ ኡቶብያ፡ ኡጋንዳ፡ ጅደ- ሰውድዮ፡ ኡቶብያ፡ እማራት፡ ቭዬን- ኡስትርያ፡ ግብሉት ሱዳን፡ ኬንያ፡ ዱባይ፡ ቀጠር፡ ግብሉ አፍሪቀ፡ ክምስልሁመ ሲንሲናቲ አሜሪካ ለህለው ኤረትርዮን ሹሀደም እብ ዛይድ ሐበን ትዘክረው። ለፊቃዶ እብ ፈራሰት ሹሀደእ ለሸራሕ ጽበጥ ክም ገብአት ህይ፡ ምን ክል ኣካን ለበጽሐተነ ሐብሬ ተአክድ።

እት መዲነት ለንደን- ብሪጣንያ እት ገአ ዝያድ ሰለስ አልፍ ኤረትርዮን ለሻረከው እቲ እብ ሄራር እገር ወኡብረሆት ሽሜዕ ለደምቀ በርናምጅ፡ 20 ጁን ምን አጅል እለ ወጠን ፍዘ ለገአው

ኤረትርዮን ሰካን ኡጋንዳ እብ ተራቶም፡ እብ ማርሺን ባንድ እንዴ ትተለው እብ ዐባዩ ሸዋሬዕ ካምፓላ አሴራር እብ እገር እንዴ ወደው፡ አምዕል ሹሀደ ሰላም ለትመደደት እት ኤረትርዮ ጥውር እግል ንብኔ መዳሊትነ ለነአክድ እት ወገለድነ ለነአጀድድ ዲበ አምዕል ክምተ እት ለአክዶ፡ ዓይላት ሹሀደ እግል ራዐዮት ዶሮም ክም ለአዘይዶ ሸርሐው።

ሕድ እበ ሸብህ፡ እብ ሰፋረት ደውለት ኤረትርዮ እት ኡቶብያ፡ ሳብት ልኡክ እት እተሓድ አፍሪቀ ወመፈወደዮት እቅትሳድ አፍሪቀ ክምስልሁመ ጃልየት ኤረትርዮ ሰካን ኡቶብያ እት ትዝመ አብረሆት ሽሜዕ ወሸቲል ዕጩይ

ወድዋረ ሰውድዮ እት ገአ በርናምጅ ዝክረት'መ፡ መሻረከት 20 ጁን እግል ሹሀደን እት ክል ሐል እብ ሐበን እት እንዘክር፡ ጋንኩም ልስኩብ ወአማነትኩም ኢትረሰዐን ለእንብል እት ክምተ እት ሸረሐ፡ መቅደራቶም ለትሰምሐ ዶር ክም ለአገዱ አከደው።

እት ደንጎቤ ዓይላት ሹሀደ እግል ራዐዮት መስኡልየት እንዴ ረፍዐው ዋጅዮም እግል ኢትመመው ጀሃት ሸሃዳት ልትህየብ እት ሀላ፡ መስኡልየት ወሰክ ራዐዮት ዓይላት እንዴ ትነሰአት 4,300 ርያል እግል ረዘቀት ሰንዱቅ እማነት ሹሀደ እተይ ገአ።

አምበል እሊመ፡ እብ አላፍ



ሰካን ግብሉት ሱዳን፡ “እምነት እብ ፍዕል” እበ ትብል ሰቅራት ዲብ ዮም 18 ጁን ዲብ ጁብ ለነዘመወ ዓደት ዝክረት ሹሀደእ፡ አብረሆት ሽሜዕ፡ ሄራር እገር፡ ወራታት ፈን ወተበረዓት እግል ረዘቀት ሰንዱቅ እማነት ሹሀደእ ለሸምል ዐለ።

ለዐለ በርናምጅ፡ መክተብ ጃልየት እብ ጀምዕ 15,000 ደርሃም እግል ረዘቀት ሰንዱቅ እማነት ሹሀደእ ልትፋገር ዲብ ሀላ፡ እብ አፍራድ ህይ 8,000 ደርህም እንዴ ትበረወው እት ረአሰለ ቀደም እለ ለዐለ ርፍዐት መስኡልየት 3 ዓይላት ወሰከው።



ሸባብ እብ ሐበን ለእንፈቅድ እት ወዓይላቶም እግል ኒጹር ገለድነ ለነሐድስ እት ካብረት አምዕል ክምተ ለለአትፋቅድ ጽበጥ ፈን ትቀደመ።

እቡ ለ'ተሌት ዝክረት ሹሀደ ህይ፡ 708,696 ብር እግል ረዘቀት ሰንዱቅ እማነት ሹሀደ ትበረወ።

ጃልየት ኤረትርዮን ሰካን ጅደ

ለልትዐለቦ ኤረትርዮን ሰካን መዳይን ልዋንዳ፡ ቤንጌላ፡ ልባንጉ፡ ካቢንዳ፡ ሳብራመ፡ ድንዱ ናይ - ኡንጎላ፡ ኤረትርዮ ጥውር እግል ብንዮት ውሕደቶም እንዴ አተረደው ዶሮም ክም ለአዘይዶ አከደው።

እብ ጀህት ብዕደት፡ ጃልየት ኤረትርዮን ሰካን ኡቶብያ እማራት፡ እማነት ሹሀደ እግል ለአትምጥ ገለዶም እንዴ አጀደደው፡ 3,100

ዲብላ እብ ፍርቀት ማርሺን ግብሉት ሱዳን ለትመረሐ ሄራር እገር፡ ዲብ ለትፈናተ ዕምር ለህለው ሰካን፡ ክምስልሁመ መስኡሊን ጃልየት ወተጀመ-ዓት ጃልየትነ እት ደውለት ሻረከው።

ዲበ መናሰበት፡ ሰካን ጁብ መስኡልየት ረፊዕ ናይ 124 ዓይለት ሹሀደእ እበ ቀንጾ እት ህለው፡ ቀደም እላመ እለ ለትመስል በዳሪት እንዴ ነስአው ዓይላት ሹሀደእ ራፍዮም እግል ዐለው ሸሃዳት ሐምዴ ተህየበው።

ኤረትርዮን ሰካን ናይሮቢ ወምምባሰ - ኬንያ እብ ጀህቶም እት ወዱወ በራምጅ ዝክረት ሐበን፡ መዕነት 20 ጁን ወሹሀደእ እበ ለአርኤ በራምጅ ጋምል ዐለ።

ዲብ ደንጎብ ናይለ መዳሊት ወራታት ፈን ወሄራር እገር ለሸምል ናይ ዝክረት ዓደት፡ እግል ረዘቀት ሰንዱቅ እማነት ሹሀደ 285,000 ሸልን ክምስል ትበረወ፡ ምን ኣካን ለበጽሐተነ ሐብሬ ኢትአመረት።

ጃልየት ኤረትርዮን ሰካን ዱባይ ወቅብለት እማራት ዲብ ዮም 19 ጁን ዲብ ሐረት መክተብ ዓም

ኤረትርዮን ሰካን ዱባይ ወቅብለት እማራት፡ ኡስክ እለ 211 ዓይላት ሹሀደእ ናይ ርፍዐት መስኡልየት ናስኣም ክምስል ህለው ለሐብሬ ተአፍህም።

ዲብ ደውለት ቀጠር ለነብሮ ኤረትርዮን ዲብ መዲነት አደውሐ ዲበ ህለ መርከዝ ዓዳት ኤረትርዮ ዲብላ ነዘመወ በርናምጅ ዝክረት ሹሀደእ፡ እማነት ሹሀደ እት ፍዕል እግል አውዐሎት ገለዶም ሐደሰው።

ዲበ መናሰበት፡ 3,900 ዶላር ወ5,620 ርያል ቀጠር እግል ረዘቀት ሰንዱቅ እማነት ሹሀደ ልትበረዶ እት ህለው፡ መስኡልየት ርፍዐት 5 ዓይላት ሹሀደእ ህይ ነስአው።

እሊ ክእነ ዲብ እንቲ፡ ዲብ ግብሉት አፍሪቀ - መዲነት ጆሃንስበርግ ወድዋራተ ለነብሮ ኤረትርዮን፡ ዲብ ዮም 18 ጁን ዲበ ነዘመወ፡ እብ አብረሆት ሽሜዕ ወሸራሕ ዝክርያት ንዳል ለትሰርገ በርናምጅ፡ 27,700 ራንድ እግል ረዘቀት ሰንዱቅ እማነት ሹሀደእ ልትበረዶ እት ህለው፡ 56,370 ራንድ እግል መትበረዶት ህይ ገለድ አተው ወመስኡልየት አትናባር 8 ዓይለት ሹሀደእ ነስአው።

ሕድ እበ ሸብህ፡ ዲብ አቃሊም ደርባን፡ ኮክሰታድ፡ መሲን ወፖለክዋን ግብሉት አፍሪቀ፡ ክምስልሁመ ዲብ ዛምብያ፡ ዚምባብዌ፡ ናሚብያ ወሌሴቶ ለነብሮ ምዋጥኒን፡ እግል 20 ጁን አምዕል ሹሀደ ኤረትርዮ እብ ዛይድ ሐበን ዘክረው።

ዲብ ሲንሲናቲ - ኡሃዮ - አሜሪካ ለነብሮ ኤረትርዮን ዲብ ዮም 18 ጁን ዲበ አዳለዉ በርናምጅ ዝክረት አምዕል ሹሀደእ አብረሆት ሽሜዕ፡ ወ6 አልፍ ዶላር አምራለ እግል ረዘቀት ሰንዱቅ እማነት ሹሀደ ትበረወው።

ኤረትርዮን

ክል አርቡዕ ለትጠ'በዕ ጀሪደት

መዳልያይ፡
መሐመድ እድሪስ

ለይአውት ወአርተዖት
* ዘህረ ዐሊ
* ፋዋን ኢድም

ተለፎን፡ 121797/07121322
ፋክስ፡127749፡ ዕ.ሰ.ቡ፡ 247

ተውዝዕ ጀሪደት፡
ተለፎን፡ 200454

አትአመሮት፡
ተለፎን፡ 125013፡ ዕ.ሰ.ቡ፡ 1284



ደርሃም ትበረወው።

ኤረትርዮን ሰካን ቭዬና- ኡስትርያ ሹሀደን እማኩም እንዴ አትመምና ጋኖም ነአስክብ እት ልብሎ፡ 9 ዓይለት ሹሀደእ እግል ልርፊዶ መስኡልየት ነስአው።

እሊ ክእነ ዲብ እንቲ ኤረትርዮን

ቁንስል ኤረትርዮ ዲበ ነዘመዩ በርናምጅ፡ ዓደት ዝክረት ሹሀደእ ገብአት።

ዲብላ አጀኒት እበ ቀደመወ አናሺድ ወኡብረሆት ሽሜዕ ዳምቅ

4^ይ ወናይ ደንጎበ ክፋል

ቅዋት ሸዕብየት መጋዊሕ 31 ዲሰምበር ናይ ሰነት 1976 እግል መራክዝ ብትሮል ወፎርቶ እግል ተሃጅም ስታት አፍገረት። ለህጃም፡ ኮሎንዩ ምን አጃፕ ክምሰል ጌሰ እግል ልግበእ ሕሱብ ዐለ። ለኮሎንዩ፡ ጃዝ፡

ሕ ር ጊ ጎ

ንህረብ፡” እቤሎም እግል ዐድነ። “ለለዐቅብነ ጦር-ሰራዊት ሰበት ህለው ሐቲ ኢወዱነ ኢነህርብ” ቤለ ከአበ እዩ አቡዩ። ግረ እሉ፡ እግል ሕሙም

ምን ጅላብ እንዴ ትባረነው ዲበ እት ሕርጊጎ ግንጉእ ለዐለ ዴሽ ተሓበረው። መራክብ ዐባዩ ህዩ ዲብ ቅብላት ጀዘረት ሺክ ሰዲድ እንዴ ገብአ እግል ልልከፍ አንበተ።



ሴፈ ውብዕድ እንዴ ጸዕነ ዲብ ገይሰ እት ገበይ ከሚን ሰውረት እግል ኢልሳድፋ እብ ዐሳክር እንዴ ተለ ልግዕዝ ዐለ። ዶልዶል ህዩ ለዐሳክር ምነ መካይን እንዴ ትከረው ምህም ወእስትራተጂያይ አካናት ፈትሾ ወእግለ መካይን ለሓልፎ ዐለው። ለኮሎንዩ ገይሰ እት ህሉ፡ ዲበ አካን ለተርፍ ቅወት አባይ ይዐለት።

ለህጃም እተ ትከጠጠ እተ ሳዐት አንበተ። አጃፕ ወፎርቶ ጽብሕ ምድር ትዘበጠዩ። ምናተ ለኮሎንዩ እብ ገሌ አሰባብ ድንጉር ሰበት ዐለ እምክሉ በጽሕ ዲብ ህለ ሐብሬ በጽሐቱ። እብ ሸፋግ ግረ እንዴ አቅበለ ህዩ እብ መራክብ ሐርብ ዲብ ልትሰዴ አመተ ኢተአመረት ህጃም እት ረአሰ ምናድሊን ቅዋት ሸዕብየት ጠለቀ። ምናድሊን ለቲለል ክምሰል ትቀየረ እተ ዶሎም አንሰሐበው።

እሊ ገብእ እት ህሉ፡ ጃብር ኢብራሂም ደሬዕ ማይ ምን ማሰረት እግል ልዕሌ ገይሰ ዐለ። ደረሳይ ሳድስ ፈሰል ዐለ። እበ አሰልፍ ሱዱፍ ለዐለ ቴለል መድረሰት እትኩሩም ሐቆለ ጸንሓቱ እት መድረሰቱ ምን ሐዲስ ቃብል ለዐለ። ጃብር ለሐድሰ ልትዘክሩ ዲብ ህለ...

አካን ብትሮል (አጃፕ) እንዴ ትዘበጠት ትነድድ ክምሰል ርኢኩው፡ “በዴነ፡ እቤ! አጃፕ ልዘበጥ ህለ

ሐቶ ዐቢ ወወድ ሐቶ (ወልዱ እግለ ዲብ ሰነት 1975 ለህደ ሐቶ) እንዴ ጸበጥኮ ለለትሐዜ ሴፈ ዲብ አድግ እንዴ ጸዕነት አሰክ ዐገምበሰ ትበገሰኩ። እንፈግር እት ህሌነ፡ ምናድሊን ዲብለ ሕርጊጎ ለተኣቲ ሐርመት ጸንሐውነ። “ሸፈጎ ሕለፎ፡ ሕለፎ...” ሌጠ ቤለውነ። አነ ላኪን እግለ ጽዕኑ ለዐልኮ ሴፈ ምስል ሐውዩ እንዴ አዘምኑ ምነ፡ ንጻፍ ለገብእ እግልነ ተኮበት ወአክያሰ ክምሰልሁመ ታርፋም ለዐለው አንፋር ዓይለቹ እግል አምጽእ ምን ሐዲስ አሰክ ሕርጊጎ አቅበልኩ። ዲብ አድግ እንዴ ጸዕነት እትበገስ እት ህሌነ እግል አቡዩ እብ ድግማን ተሐሰብክዉ። ህቲ ላኪን እት ቆሉ ሌጠ ሐጠጠ።

እንዴ ሐደግኩዉ ነሳፈት ክምሰል ሄረርኩ ብዕድ ለትረሰዐኩዉ ዐፍሽ እግል አምጽእ አዜመ አሰክ ቤት ግረ አቅበልኩ። ዲብለ እት ሕርጊጎ ለተኣቲ ሐርመት ክምሰል በጽሐኮ ምናድሊን ጸንሐውኒ ኩ “ማንጃሰ! ደባባት ለአትዩ ህለዩ አቅብል” ቤለውኒ።

ጦር-ሰራዊት ሳዐት 9:00 እሰቡሕ ዲብ ሕርጊጎ አተው። ሐርብ ሰበት ትመዩ ዲብ ፈርሆ ቶም ለአተው እተ። አሰልፍ አገር ዴሽ ምስል ደባባቱ አተ። ሐሬ እብ በሐር ለመጽእት ቅወት በሐር

ለቀናብል እግል ጋድም ሕርጊጎ ጨበል ተሐቲ ለዐል በለሰ።

ምን ቅብላት እት እንርእዮም ለዐሳክር አንደዶት አብያት ወቃተሎት ሸዐብ አንበተው። አሰልፍ ዲብለ አብያት ለጸንሐዮም መምተለካት፡ ደሀብ፡ ልባስ ወሰላዲ ዘምተው። ግራሁ እግለ አብያት ምስል አዳሙ አንደደዉ። ሰሮም ህዩ ምን ቤቶም እንዴ አፍገረው ቀቲሎም ዐለው። ሳዐት 1:00 አደሐ ክምሰል ገብአ ለልዘመት እንዴ ዘምተው ወለልትቀተል እንዴ ቀትለው አቅበለው።

ዲብለ እብ ተናናት ግልብብት ለዐለት ዐድ ክምሰል አቲነ፡ አሰልፍ ግናዘት ናይ አሰይደ ሰዲደ ዐሊ ተሃደፈተኒ። ለእሲት ድግለሊት ወሕጅብት ተ ለዐለት።

“እንቲ ወለቹ፡ አነ ድግለሊት ወሕጅብት ሰበት ገብአኮ ሴመ



ኢወዱኒ። እንቲ ላኪን ውላድኪ እንዴ ጸበጥኪ ህረቢ።” ክምሰል ቤለተ እግል ወለተ፡ እብ በይናቱ ዲብ ቤተ ለተርፈት። ዐሳክር አቶብዩ አብያት ዲብ ለአትናዶ ወአዳም ዲብ ቃትሎ ባካት ነምቦ ክምሰል በጽሐው ህዩ ዲብ ቤተ ረክበው። ዲብለ ዐለት እተ አካን ለምበ እንዴ ከዐው እተ አንደደዉ። ለቤት ክስት ክምሰል አበልናሁ፡ ለእሲት እበ እሳት ገርበ ባሸል እት እንቲ ጸንሐኒ።

አላየመት፡ ምነ ደብር እንዴ ትከረ ሸንክት በሐር ገጹ አረበው። እንዴ ዐሬት አሰክ ትካይዱ ህዩ ሸዐብ ምነ ድዋራት እንዴ አሬመ ሀርቡ።

ሐቆ እለ አነ ዲብ ቤትነ ጊሰኩ። ላኪን ቤትነ እንዴ ነደት ጨበልቢሎ ጋብአት ጸንሐተኒ። አቡዩ ክምሰል ኢጸንሐኒ ህዩ ሰኒ ትሻቀልኩ። ክምሰል አቦቹ ሰዲደ እንዱዳሙ እግል ኢለሀሉ ሰበት ፈርሆ እግለ ጨበል እብ ዕጫይ

እንዴ ወዴት ሐናፍሉ ዐልኩ። ላኪን አዜመ ግናዘት አቡዩ እግል እርኩብ ኢቀደርኩ። ዲብ ደንጎቤ አው ሞተ፡ አው ዲብ ጨበል ባርህ ትብደለ አው ህዩ እንዴ ነሰአው ጌሰው እብ እንዴ እቤ እት ክላሰት በጽሐኩ። ግረ እለ ዓይለቹ ሕብዓም እተ ለዐለው ዐገምበሰ ግሰኩ። አቡዩ ምነ ለልክሸዐልል ፈነ እንዴ ነግፈ ምስል ዓይለተ እቲ ጸንሐኒ። ለኢታኬኩዉ ሰበት ዐለ፡ እብ መትዐጃብ ተወው ብህል ዲብ አነ አቅመትኩዉ።

ሸዐብ ባጽዕ ቴለል ሕርጊጎ ክምሰል አመረ፡ እብ ገበይ እምክሉ እንዴ ወደ ዲብለ ፍንጡር ለዐለ ሸዐብ ነብረ ወልባሰ እግል ልንደእ አንበተ። እተ አያም ለህይ ዝላም ድቅብት ትዘልም ሰበት ዐለት፡ ብዙሕ ምን ሸዐብ ሕርጊጎ እብ ጥገዕ ውብዕድ ሕማማት ተአዘ።

ዐሳክር አቶብዩ፡ ሸዐብ ምን ሐዲስ ዲብ ዐዱ ክምሰል ኢለቀብል እንዴ ወደው ቶም ለጨፍጨፈዉ። ልእክት ናይ እሊ ህዩ ሕርጊጎ እግል ልጽቦራ ቲ ለዐለ። መሃምም እንዴ አግደው ምነ ድዋራት እንዴ ተሐየበው ክምሰል ጌሰው ላኪን፡ ሸዐብ እተ ዶሉ ዲብለ ክሉ ረአሰ ድምርት ለዐለት ዐዱ አቅበለ። አዳም ብዙሕ ሰበት ፈነ፡ ክሉ ቲ ለበኬ ወጃምም። ምሮ ለለትአዝም ይዐለ። ክሉ ዲብ ላቅሰ



“ወለት ምድን እት አከድን”

እት መዲነት ለትወለደት ወለዐቤት ኢትመሰል። እግል ሸቅል ድኢኮን፤ እግል መትጋራም ለገብእ ወቅት አለቤ፤ ምስል ወክድ እት ትትባደር ትሸቄ ወትትገናቤ። ምን አሰብሐ እት ምሴተ ምነ አነነት ሸቅለ ኢትረይም። እግለ ሐሰ ተጠውር ወመንበረት ተአትቃምት። እት አነን ሸቅል ለዐል ወተሐት ትትሳሰዱ። ሸቅል ተአትመቃሬሕ፤ አላት ሸቅል እቡ ተሐፍር፤ ትሸቅር፤ ተሀርም፤ ማይ ተአትሳቲ፤ ፍሬ ትቀንዋሽ ወአስክ ሱግ ትልእኩ። እብ ንዘም ሳቦታት አምዕላይ ወራታት እት ወክዱ ተአትምም።

እብ ሰብ ተብዕን ምልክት ለዐለት ወራት ሐርሱ፤ አንሳት ሻርክ ዲበ ወእብ ዕጹፋት ክም ከሰበ ምነ እብ ዐመል ለአርኤት ተ። ህተ ለትመርሐ መሸሮዕ ዐማር ሐርስ ክም መሰል ሰኔት ቱ ለልትዐለብ። እተ ጋድም ርሒብ ለትፈናተ ወራታት ሐርስ ትወዴ ወትራክተር ዐቢ ትሰውግ። ጋድም ርሒብ ትሳዋር፤ ትልም ተአፈግር ወትሐርሱ፤ ትሸዕግ ወትመዳምድ። ምን ሸትል ዲብ ፍሬ ለትዐደ ሐምሌ ወእክል ተዐቅብ። እብ ሕምድት እዳረት ማይ ገርሀተ ተአሰቲ። ባልዲን ወሀረሞ ትዳገን። እተይ ብዙሕ እግል ትርከብ ክሉ ለገብእ አሸቃል ተአታምም። ምነ ካድም ፍሬ ለሀበታመ ትረክብ። አነን አብ ወእም ፍንጌ ቤት ወከደን እት ተአውሀሌ ወትሸቄ፤ ውላደ ተዓቤ ወመናበረቶም ትዋሌ። እብ ዐቢሁ ህይ ሰርጉል ወቀይ ሐርስ ተአነጃሕ ህሌት አሰይደ ዮርዳኖስ ሀብታይ።

አሰይደ ዮርዳኖስ ሀብታይ እት ደነግብ 1979 ዲብ ማይተመናይ አሰመረ ትወለደት ወዲቡ ዐቤት። ምን መአንብታይት አሰክ ካልኣይት ደረጀት ምህሮህ ዲብ መድረሰት ማይተመናይ፤ መድረሰት ናጽነት ወአሰመረ ሓፈሻዊ ደርሰት። እት ሰነት 1997 ዲብ ሰልፍ ዕምር ህዳይ እም ዕያል ገብአት። ብእሰ ሙሴ ኢሲያስ ምሮት ምነ እት

ንዳል ሕርየት እንዴ ሻረከው ዶሮም ለአውፊው ወሕርየት ለረአው መናድሊን ቱ። እብ አሳሰለ ሕኩመት ለአፍገረቱ በርናምጅ ሰርሐ፤ መናድል ሙሴ ምን ክፈል ዲሸ 96 ክም ትሳርሐ፤ እተ በዲር ምስል ውላድ ውሕደቱ እት እንቱ እብ ገበዩ እት ለሐልፍ ልርእዩ ለዐለ ድዋራት ሕሊል ሳዋ እንዴ ጌሰ አነን ሐርስ እግል ትትሀየቡ ጠልቡ። ምሮት ምን መአንብተት ሐርስ ሕሊል ሳዋ እንዴ ገብአ ህይ፤ እት ዐማር ሐርስ አተ። እት ሰኖታት ሐድ ሄራር ሰኔ አምጸአ። ዮርዳኖስ ብእሰ እግል ትጋኔሕ ቱ ሰልፍ ኢነት ምስል ምድር ሐርስ ለትአመረት። ምን አሰመረ ቅያስ ሰለሰ ምእት ኪሉ ምትር እንዴ ጣዩመት፤ እግለ አነን ሐርስ ደልሀተ። እት ምሮት ሐል ምሮት ጅኔታዩ ወልደት ወፈርዐ ሐጠጠት። እግለ በክት ወሄራር ጼዋሆም ለልሀንእ ሸይ ትክለቀ - ወራር ወያኔ ሰነት 1998።

ብእሰ ዮርዳኖስ ሀብታይ፤ ክም ክሉም፤ ለዲብ መናበረት በርጌሰ እቅቡላም ለዐለው መናድሊን ወአንፋር ክድመት ወጠን፤ እግል አፍሸሉት ወራር ወያኔ ዲብ ጠዋቢር ቅዋት ድፈዕ ተሓበረ። ሚርሓይ መጅሙዐት እንዴ ገብአ ህይ ተሓረበ ወአትሓረቡ፤ ዮርዳኖስ ህይ ምስል ሐሙህ ወዘግህ እት ትትሳዲ፤ እግለ መራዐየት ወዐቂብ ለልሐዜ ጸር ሐርስ ረፍዐቱ። እናሰ ለአንበተየ ወራት ሐርስ እግል ተአተላልየ መሀሮተ ሰደት። ኩሉ ወክደ ወሐለተ እት ሕሊል ሳዋ ሓለፈቱ። እግል ለአቅብለ ገበዩ ተአናኬ ለዐለት ሙሴ ኢሲያስ ላኪን ዲብ ካልኣይ ወራር እብ ፈራሰት አሰተሸሀደ።

ዐማር ጀራዲን ሕሊል ሳዋ፤ ሐቆ እስትሸሃድ ብእሱ፤ ምነ ክም ኢሊሐልፍ ለአመረት ዮርዳኖስ ሀብታይ፤ እግለ ሸቅል ሰኔ ጸብጠቱ። እግል ልሳድፈ ለቀድር ተሐድያት እግል ትጋብህመ ሰኔ ወአማን ትዳሌት። ሄራረ ወተጠውራተ ለልሀንእ አሸየእመ፤ እት ተአምሩ

መጽአት። እግለ መሸሮዕ ጃርዲን እት ለትወቀለት ደረጀቱ እግል ተአብጽሐ ኤተነት። “ሄራር አልፍ ማይል እብ ሐቲ ምስዳር ለአነብት፤ ሰባተት ህይ እት ህደፍ ተአበጹሕ”፤ ምን እለ ፍክረት ምን አነን ጃርዲን እንዴ ኢትአንከሰክሰ ሸቄት። ምን ሄራረ ሐር ለበልሰ ምክር ወገመሚትመ መጽአዩ። ለሸቅል ትቀድሩ መኢፋለ ሰኣል ዲብ ቀደሚህ አትገሰው እለ። አቃርብ ለሸቅል ምነ እንዴ አገመት፤ አሰመረ እንዴ ፈግረት መናበረተ እብ በሰር ብዕድ እግል ትምረሕ ገመወ። ምናተ እግለ አንበተቱ መሸሮዕ እንዴ አተላሌት፤ እት መርሐለት ዐውቱ እግል ተአብጽሐ ብግስት ክም ህሌት አሰአለቶም። እበ ለሳድፍ መሐለኪት ወገመሚ አዳም መሀሮተ ኢፈትሐት። እግለ ምን ቀዳሙ እት ሕሊል ሳዋ ለትአሰሰ ጃርዲን፤ አሰክለ ፈይሐ ጋድም ፎርቶ ሳዋ እብ ክራይ አርሐቡቱ። እብ ብዙሕ ዕጪይ ወሐምሌ ጠወረቱ። እሰልፍ እግለ እት ባነተ ለዐለው ሐረሰቶት መሰል ሰኔት ገብአት። ተጃርብ ብዝሓም ሐረሰቶት አድረሰ። እት ትትአመር ጌሰት። ምን ምዴርየት ፎርቶ ሳዋ ወአቅሊም ጋሽበርክ ወኪን እብ ደረጀት ደውለት እግል ትሕሰብ ሲናዶ ረክበት።

ሰነት 2014፤ ዮርዳኖስ ሀብታይ እት መሕበር ሐርስ አንሳት ኤረትርየ ተሓበረት። ለመሕበር ብዙሕ ባባት ካሰተ እለ። ምህነተ ለትዓቤ ቡ ለትፈናተ ኮርሳት ሐጪር ወድሩሰ ረክበት። አካል፤ ፍሬታት ወሐምሌ እግል ትዝረእ ወትአፍሬ ቀድረት። እብ ንዛም ረይ በሰል ወበርበሬ፤ እብ ዝላም ከረም ህይ ጣፍ እት ዘርእ፤ እተይ ሰኔ ጃቀፈት። መናበረተ እት ትአትሓይሰ ህይ፤ እት መንበሮ ሰኔት ተዐዲት። ለትነበር እተ ቤት እግል ትብኔ ወእት ለትፈናተ ክድመት ለትአውዕለ መኪነት ዐባይ ተወበት።

“ርእየት እምነት ተ” ክምለ



አሰይደ ዮርዳኖስ ሀብታይ

ልትበህል፤ እሉም ለ “ኢትቀዲሩ፤ ኪን ቤሉ ምንኪ፤ እተ ኢትፈግሪ ምነ ወሐል ዕዳይ ኢትትሸመሚ” ልቡለ ለዐለው አቃርቤ እበ ፍገሪት መጅሁደ ተዐጀበው። ምክሮም ካዋየት ክም ዐለት ፈሀመው። ሸቅለ አሰክመ ሰብ መቅደረት ሐርስ ለአትፈክረ ዐለ።

እተ ተዐምሩ ለህሌት 20 ሄክታር ርሕብ ምድር፤ ፍገሪት ሰኔት ለትህይብ ዐማር ሐርስ ተአሸግብ ህሌት። እግል ወቀሉት እተየ ህይ ካድም ትሩድ ትወዴ። አርድ ለእለ ሀብካሁ ቱ ለበልሰ። እግል ረሸዶት ትርብተ ደለ ትትቀደረ ኩለ ወዴት፤ እተይ ሰኔ እግል ትርከብ ህይ ወክድ ኢነሰእ ምነ። ሰብ ምህነት ለወሰቀወ ወለአከደወ ሐብሬመ እለ አማን ለትአክድ ተ። በሰል ምን አሮት ሄክታር አሰክ ክልኤ ምእት ኩንታል፤ ወበርበሬ ምን አሮት ሄክታር አሰክ ዕስረ ኩንታል አቲት። ምን ጣፍመ ሰእየት ሰኔት ለልሀይብ እተይ ረክበት። ምን ሄክታር ዝያድ ዐስር ኩንታል እት መክዘነ ከሬት። ምስጢር እለ እተይ ብርኩት፤ ካድም ሐርስ ክም ቱ ትሸፊሕ። ምን ግልገል አሰክ ምዕል ቡቲክ ለገብእ ለኢለአትካርም ካድም ክም ትወዴመ ተሐብር። ፈጃይ ሸፍር ምነ እብ ዋጅብ እንዴ አንበተው ለልትነፍዮ ሐረሰቶት ክም ገብአትመ ሸቅለ ለታብዖ ሰብ ምህነት ሐርስ ለአክዶ።

ሞጅ ለኢትዐዲት ጀልበት፤ እት ጀዚረት ሰላም ኢትበጹሕ። ናይ ጠቢዐት ወኣደሚ መታክል ለኢልትዐዲ ነፈርመ፤ እት ምሕል ዐውቱ ኢልሸእግ። እግለ ትራቅቡ ወለኢትራቅቡ መሐለኪት እት ባትክ ድኢኮን፤ እብ ምትክራርክ ለመጽአክ ነሰር ኢሀለ። ዮርዳኖስ ሀብታይመ፤ እት ለትፈናተ አውካድ መታክል ሳደፈዩ። ህተ፤ ለአክ ወምን ደሚረ ለኢቦዴ ተየልልመ ሱዱፋ ቱ።

እት ሰነት 2013 ቱ። ዝላም ቅዝር ለሰበቡ ውሒዝ ድቁብ ፎርቶ ሳዋ አተ። እት ጀራዲን ብዙሕ ደማር ድቅብት ሰበቡ። እብለ ብቆት ዮርዳኖስ፤ ቅያስ ሰቦ ምእት አልፍ ነቅፈ ለልትቀየም በርበሬ ወበሰል እብ

ተማሙ ትደመረ ምነ። ምናተ ለምድረት ኢሀደደተ ወለከሳርመ ይኣደንገጸተ። እብ ዕጹፋት እንዴ ሸግበት እግለ ትከሰረ በክት ክም ትበልሰኡ ትጸገመት።

ወራታት ሐርስ ዮርዳኖስ ሀብታይ፤ እት አካል ወሐምሌ ሌጠ ለበጥር ኢኮን። ዐስር ሐምስ ወአት ምን ሐ ሐሊብ ወጂበትመ ታውብት ተ። ለሐ ምነ እት ሰነት 2008 ውዛረት ሐርስ ለሀበዋተ ሐቲ ወአት ለተወበት ተ። ለመደት ለሀ ዮርዳኖስ ወአት ምቅርብ ተሀየቡት። እጋል ዲብ ውዛረት ሐርስ በልሰት ወለወአት ፈርያይት ህይ እግለ ተርፈት። አዜ ዐስር ሐምስ ረአሰ በጽሐት እለ። ዕጹፍ መሳሌሕ ህይ ተሀይቤ። ሐሊብ እንዴ አገቤት ማህየት ሸቃህ ትደብእ እቡ። ሸፍረ ህይ ጃርዲን ተአሸፍር እቡ።

ቀያያር እተይ፤ ሕኩመት ኤረትርየ ምነ ተአትናይቱ ወክም ለመድ እግል ልሰበቅ ለትሐዝዩ በሰር ሐርስ ቱ። ምን አሮት እተይ ዲብ ብዕድ ለትፈናተ እተይ አተንካብ ወሸቂ ሰኔ መክሰባይ ቱ። ዮርዳኖስ ሀብታይ እትሊ መጃልመ ሰእየት ለትህይብ መርሐለት እተ አትየት ህሌት። ምስል ሕተ እት ትትዓውን፤ እግለ ዲብ ጃርዲን ለትዘርኡ በርበሬ፤ እብ ሸክል አዋዜ ወበርበሬ ድቁቅ እንዴ አዳሌቱ ከዲብ ሱግ ተአዘቢ ህሌት።

ሐቲ ምን ሸባብ መሰል ሰኔት ሐረሰቶት ጋብአት ለህሌት ዮርዳኖስ ሀብታይ፤ ሰርጉል መትቀዳም ሸቅል እግል ተአርኤ ናይ ብዝሓት መአሰሳት ሕኩመት ወአፍራድ እብ ዓመት፤ እዳረት ምዴርየት ፎርቶ ሳዋ ወመርከዝ ህይአት ተድራብ ቅዋት ድፈዕ ኤረትርየ ህይ እብ ፍንቱይ፤ ሰዳይት ብዝሕት ክም ወዱ እለ ተሐብር።

ውዛረት ሐርስ እት ረአሰለ ክል ወክድ ለትከልቁ እለ አብካት ተእሂል ወድሩሰ፤ አምር እግል ትርከብ፤ ወምህነት እግል ትክሰብ፤ አሰክ ደውለት ኡጋንዳ ነድአተ። እግለ ረክበቱ አምር ወተጃርብ ምስል ናየ ርሒብ ተጃርብ እት ተአትመሳ፤ እብ ዕጹፋት እት ሸቄ ዲብ ለትወቀለት ርሸመት ዐውቱ እግል ትብጸሕ፤ እት ካድም ትሩድ ክሰእት ህሌት ዮርዳኖስ!



2^ይ ወናይ ደንጎበ ክፋል

ለዲብ ማይ ድብነት ለአጽበሕነ እተ ፈጅር ሐቲ ምን ዝክርያት ንዓል ተሕሪር ወሲያደት ለተኣተሐድሰ ናይ ሐበን ዕለት ዐለት። ለምናድሊን ወለዋርሳይ እብ መሕበር መሕበርም ዲበ ቀደም እለ ሻትላሙ ለዐለው ወዮም ዲብ ደረጀት ሰኔት ለህለ ግሪህ ዕጩይ እንዲ ትፈንጠረው ክል ዎርክ መንዲረት ዲብ ገርሀቲ እንዲ ተክሉ፡ ምስለ እግል ሹሀደ ለነሸድ ወመጅድ ሐልየት እብ መክረፎናት ልሰመዕ እቲ ለዐለ ወክድ ቲ። ኣናመ በክት እንዲ ረከብኮ ምስለ አሰማዮም ለኣመርኮ በዲር ዲብ ሮሪ ሐባብ ወነቅፈ. ጀማሂርን ለዐለው፡ ወዮምም ዲብ መሕበር ጀማሂር ሳሕል ክምኡማም ለህለው ጀማሂር ሳሕል ትሓበርኩ። ምስል ከረ አሰፋሹ፡ ወድ ሰቤ፡ ለተኪዳን፡ ልዩ ወብዕዳም እንዲ ገብአኮ ህይ፡ ምስሎም ዶል ገረዊነት ወዶል በዲላት ዲብ አተርቲ፡ ዶል ዲብ ሐፍር ወዶል ዲብ እሽቅር ደሚርዬ ረይሐኩ። ለጀማሂር ለደአሎም ወለመዕጸሞም ክምስል ርኤኮ ህይ፡ ያሬት ወድ መሕበርም እንገብእ እቤ ከተምኔኩ።

እትሊ ወክድ እሊ መደት ሳዕት ዲበ እብ ዕጩይ ቀላሚጦሰ ወብዕድ ግልቡብ ለዐለ ግሪህ ዕጩይ ዲብ ነሐፍር ወእንሹቅር፡ ለመዐደይ ጽርግዩ ትኩል ለዐለ ስቲጅ እተሓድ መሓበር ምሕርበትመ እብ መንዲራት እንዲ ትሰርገ፡ መዳልየት ለናይ ዓዳት ወራታቶም እግል ልሰርግሎ ለዐል ወተሐት ልብሎ ዐለው። መክረፎናቶም ዲብ ለአትሳኑ ወለአትራትዮ ጸብሓም እንዲ ዐለው፡ ምድር ዲብ መዓል ገዱ ሰበት ጌሰ ወጸሓይመ ተሐፍን ሰበት ዐለት እብ መክረፎን እት ልትላከው፡ “ከላስ ከፊኩም አዜ እንሰር ምጽኦ በርናምጅን እግል ነኣንብት” ዲብ ልብሎ ልደሀው ዐለው። እብሊ ህይ ዲበ ናይ ገማል ዕጩይ ሹሀደ ጸብሕ ለዐለ አዳም ክሉ አስክለ አካነት ሄረረ። ኣናመ በክት እንዲ ረከብኮ ምስለ ምስሎም ጸብሕ ለዐልኮ አንፋር መሕበር ጀማሂር ሳሕል፡ እግል ምስውር አቅሊም ምግብ ላቲ ጆን “ነዐ ሰውረ” ክምስል ቤለው፡ ኣነ ላተ ጀፈር ጸብዋ። ለወክድ ልዩ ነዐ እብዩ ትጀፈር ህሌክ ምስልን ትሸቐ አጽበሐክ ማሚ፡ አዜመ ምስልን ትሰመር ቲለተኒ ወምስለ እንሸቐ እቡ ለዐልን ገረዋይን ወበዳይልን ሐቲ ናይ ዝክረት ሱረት ትሰወር።

ሐቆ እለ በርናምጅ ሰንበት ዐባይ 18/6/2023 እብ ዝክረት ሹሀደ አንበተ። ክምስል መእንበት በርናምጅ ህይ መስኡል መሓበር ተዓውን መናድሊን፡ ምናድል ሰለሙን ተወልዳ ክሊመት 20 ጁን ቀደመ። ህቲ እተ ክሊመቲ ምን ክቡድ መዓኒ ወሽዑርክ



አንፋር ጀማሂር ሳሕል እት ማይ ድምነት

ለለአተርድ ዛዖታት ሐቆለ አሰመዐ፡ እብ ፍንቱይ ዝክረት 20 ጁን ሰኒ ትርድት አምዕል ሐበን ክምስልተ እብ ደማነት ነፍስ ራሽደዩ። ክሉ እሊ መሓበር መትሳዳይ መቃትሊን እንዲ ትበህለ ነናዩ መትካም ዋዲ ለዐለ አዜ እት ጽላል ዎር እተሓድ መሓበር ምሕርበት ክምስል ትከምከመ ህይ ሸርሐ።

ሐቆ እለ ለእብ ፍሬ ወጠን ላቲ ማንጃሰ ለአንበተ ሸዕር ግራሁ እበ ዐባዩ ሐልየት ወሹዐረ እብ ለትፈናተ ሀገጊት ዐድነ ሐልየት ወአሸዓር ደርብ ሕድ እግል ልትቀደም አንበተ። ክሉ ህይ ለህይክ ምን ለህይ ለልተረድ ዐለ። እበ ዐባ ሻዕር ላቲ ሳሚኤል ገ/ አዶናይ “ሚ ዶል ገብእ ሰላሰ በጽሐ እሊ እዋን?” ለትብል ሸዕር ላቲ እግል ክሉ መተንሲያይ ግረ እት ዝክርያት ንዓል ወፍርሰነት ለትበልሰ ዐለት። እሎም ዮም ሻይዖታት፡ ሰርም ገርዖም እንዲ ደዐፈ ወዐቡ ሰርም ጀላብ ሕርየት ወሲያደት እደዮም ለትህናክለ ወእገርም ለሐንክሸ ምሕርበት ለማሌ ዲብ ምድር ንዓል ሸባብ ለዐለው እቲ ወክድ እግል ልትፋቀዶ ላብድ ዐለ።

አሰር ሸዕር ወድ አዶናይ እግል ነዖረት ታሪካይት ዕለት ለሸፊሕ ብዙሕ ሐልየት እብ ትግርኛ፡ ትግራይት፡ ዐፈር፡ ናረ፡ ብዳዌት ወብሌን ትቀደመ። ለሃክ አሰር ለህ ህይ ናዩ ሚዘት ወለዘት ዐለት እግላ። ላመ እግል ዝክረት ሐበን ላተ 20 ጁን እት ማይ ድምነት ፍሩሬም ለዐለው መግምለት አምዕል ሸውሀደ እት ፍንቱይ ሸዑር ሸሙማም ክምስል ዐለው ልትፈሀመኩ። ገሌ እብ ደሚር ሕቡን ዕንታቲ ነብዕ ወሰርመ ፋሬሕ እት እንቲ ዲብ ልሰሐቅ ትርእዩ። ሰርመ እብ አትቃዋር ሄራር ማሌ እብ መትዐጃብ ለአስተንትን ተአቀምቲ። እንታመ ምስለ ምሕርበት ዲብ ዝክርያት ንዓል ወግራሁ ለዐለት መዳፈዐት ሲያደት ትሸመምኩ። ኣናመ አሰናይ ዋርሳይ አበውዬ ወሐውዬ ገብአኮ ህይ እቤ። ለሐልፈ ቴለል ንዓል ዲብ አትዋይን ህይ ለዲብ ሕፍዘት ሲያደት ወጠን መጦርዬ ለዐለው ምሕርበት እግል እዘክር ላብድ ዐለ። እብሊ ህይ እግል እትዘክር ወአስተንትን አንበት። እግልሚ ለአምዕል ለህ በህለት 20 ጁን አምዕል አስተንታን ወአምዕል ሰርቤብ ወሰፈላል ሰበት ገብአት።

አቤ! ሐቡር ሸዑር ወምስትንክር ታሪክ! እት አምዕል ዝክረት ታሪክ ሐበን ሰበት ህሌኩ ክሉ ለሐልፈ ንዓል ተሕሪር ወግራሁ ለዐረ ንዓል ሲያደት እግል ተአትዋይን ላብድ ቲ። ኣናመ ዕምርዬ ክምስል ተማቲ ዲበ ሓርያይ ንዓል መዳፈዐት ወጠን እግል እትሓበር በክት ለረከብኩ። ለንዓል ህይ እበ ቅድረጅ ሐቡር እቲ ሰበት ዐልኩ።

ኣናመ እብ ጀሆኹ እግል ዲብ መደት መዳፈዐት ሲያደት ምስልዬ ለዐለው ወእብ ፈራሳት ዲብ ልትሓረዐ ዲብ ክል ሸብር እለ ወጠን ለወድቀው ፍራሰ እግል እዘክር ጠቢዒቲ። ለምናድሊን ማሌ ላተ ለሃክ ምን ለህ ተረደት እቶም። ለዲብ ሳሕል፡ በርኩ ሰምሀር፡ ክበሉ፡ አስክ ሰባት ዳንካልዩ ጀላብ ወጠን ወሸዑብ ለናደለው እቲ ወዲቡ ለሓለፈዉ መዓላቶም ወለ ዛይደት ፍርሰነቶም ወለ ለአትዐጅብ እስትሸሃዶም። ክምስልሁመ፡

መትሰባሎም እት ሰቢል ሕርየት ወሲያደት እለ ቃልየት አርደት ክሉ ለህይክ ምን ለህይ ለልተረድ ዝክርያት ሐበን ዐለ። እብ ክእነ ህይ ለመናሰበት እንዲ ይእመሸኩ፡ ጸሓይ ዲብ ተሐፍን ሰበት ጌሰት ሳዕት 11 ቀደም አድህር ክምስል ገብእ ለዲብ ማይ ድብነት እብ ኬወ ገማል ወሐር እብ ዝክረት ሹሀደ ለአንበትናህ መናሰበት እብ ነሺድ ወጠን እንዲ አትመምናህ አስክለ መኪነትን ሓድጋም እቲ ለዐልን ባካት ሺሪክት ሰገን ሄረርኩ።

ምን ማይ ድብነት እብ ምግብ መዲነት አስመረ እንዲ ሸገግኮ እተ



ምስኩናም ሐርብ መዐስከር ደንደን

መዐክሰር አው መንዘል ሕሸመት ላቲ መዐስከር ደንደን ክምስል በጽሐናመ፡ ለመናሰበት ለሸፊሕ አዋይን ትክበቲኩ። ዲቡመ እግል አልዐስር እብ መናሰበት ዝክረት ሹሀደ ልዓሌ ለዐለ ወራታት መዳልየት ሰርም ከራሲ ዲብ ካሩ ወሰርም ዳስ ዲብ ተክሎ ወመክረፎናት ዲብ ለአትሳኑ ትክበተውኩ። ኣነ ጋሻይ ምንመ ዐልኮ ለናይ ምሴ በርናምጅ መንዘል ሕሸመትመ ክመ ናይ አሰቡሕ ናይ ማይድብነት እግል እሻርክ እቲ ዳሌኮ ወነዌኩ።

መዐስከር ደንደን ሰሜቲ ምን ዲብ አፈት ነቅፈ ለህለ ታሪካይ ደብር ለመጽአት ቲ። አቤ! ደንደን ደብር ሐበን ቲ። ታኪ ወክሉ ረአሱ ሐቲ አምዕል እንዲ ኢደንን አስክ ኢነት ሕርየት ሻንን እት እንቲ ንዓል ለሓለፈ ደብር ኤማን ቲ። ደንደን እግል ዌረት ሰብ ቃጩፎት ወዘሚት ለአተብረኩ እት ርሽመቲ ለትሸፈለ ምሕርባይ ዲመ ዐውቲ ልደረር እት ህላ፡ እት ደብር ደንደን ለለአተንክብ አባይ ላኪን ናፍራዩ ለአቀብል ይዐለ። እብሊቲ ህይ፡ ዮም ሐቆ ሕርየት መብዘሐም ለማሌ ዲብ ሳሕል ዐለው ምሕርበት ወዝያደት ክሎም ጀላብ ወጠን ወሲያደት ቃሊ ገርዖም ለትበረዐው ፍራሰ ሳክናሙ ለዐለው፡ በዲር እብ “ቃኘው ስቴሸን” ልትአመር ለዐለ፡ ‘መዐስከር ደንደን’ ለትብል ሰሜት ሰመው። አማናምቲ ደንደን መስከብ ፍራሰ ሰበት ገብአ፡ ምን እለ ለትትገዌ ወትትፈደል ሰሜት ይህሌት። ለዲብ ቅንቤት ነቅፈ ለህለ ደብር ደንደን ደብር ሐበን ምን ገብአ፡



ለዲብ ረሃበት መዲነት አስመረ ለህለ መዐስከር ደንደንመ እተ ክምስልህ መስከብ ሐበን ወሕሸመት ቲ።

አልዐስር ክምስል ገብእ ለአስቡሕ ዲብ ማይ ድብነት ዲብ ሸቲል ወሺቀር ዕጩይ ሹሀደ ጸቤሕ እቲ ለዐልኮ ድበዕ ማይድብነት ወሐርመ እት ረአስ በልሒት እመን እንዲ ትገሌኮ ፍረቅ ዓዳት ዐፈ እቲ ለዐልኮ ሮራብ ማይ ድብነት ዲብ አትጋይሱ። ምን ገጽ ምሴ ላተ ዲብለ እብ ከራሲ ለትክለሰት ጂራፍዮሪ መዐስከር ደንደን እተ ክርሲ ሓምል እንዲ አስተረሐኮ እግል ዱሉይ ለዐለ ወራታት ፈን እግል

እዲ መጤት ወትመጤት። ዕን ዐፈት ወትዐፈት። እዘን እግል ሰመዕ ክር ገብአት ከአትንሲት።

ለእብ ኣናሺድ ቀይሒት ዕንባብ መዐስከር ደንደን ለአንበተ በርናምጅ ዝክረት ሹሀደ ደርቡ ለትፈናተ አሸዓር ወሐልየት አተላላ። ክሉ ህይ እግል ሹሀዳነ ለሰናቄ ወለሐምድ ዐለ። ክሉ እትሊ እሕትፋል ልትቀደም ለአምሴ እግል ትምሸጉ ለኢትቀድር አሸዩእ ብዙሕ ምንማቲ፡ አዜመ እብ ቅድረት መዳልየቲ ወመቀድመቲ ለትፈናተ ዐለ። እብ ፍቲይ ሻዕር ወፈናን ሳሚኤል አዶናይ እብ ክሰሱ ደንደን ለቀደመዩ እት አልባብ መተሰንዩት ወዳፍየት ናዩ አሰር ዛህር ዐለ እለ። ደብር ደንደን ዐርገ እቡ ወትከረ። ክሉ ህይ መትዐጃብ እብ ጣቅዲት ሸርሐ እግሉ። ክምስሌሁመ ለዲብ መዐስከር ደንደን ለትወለደው ውላድ ደንደን እብም ለትቀደመ ኣናሺድ ወአሸዓርመ ሐድ ይዐለ። እሊ ህይ ለማሌ ዲብ ደብር ደንደን እንዲ ትሸፈለው ዲብለ ሳብት ሰዋትሩ መይቶ ወቅትሎ ለዐለው ምናድሊን፡ ሳምኤል ወዳይኖመይ እብ ሕላይ ወሸዕር ለቀደመው፡ ክምስልሁመ ለዲብ መዐስከር ደንደን ምን ትወለደዩ ከረ አማል መሐመድ፡ ፍሂመ ሸፊ፡ ወአሙነ መሰ ለትቀደመ አሸዓር ሹሀደ ለህይክ ምን ለህይ ለልትሐሬ ዐለ። እብ ፍንቱይ ለእብ አሙነ መሰ ለትቀደመት “ምስጢር ሰለሰ” ለትብል ሸዕር እብ ቅሰተ ላተ ዝያደት ምን ዲብ ሸዑር ለአቲተኒ ዐለት። እግልሚ፡ ምስጢር ሰልአስ በህለት፡ ሸሂድ ወሸሂደት ወእለ እተ እንብር ቃልየት አርደት፡ አው ህይ ለክልኦት ሰብ ሻማት ለሸንብሬብ ወለ መንደላይ በጼሕ ወለ እት ኩብድ ሐመ ለዐለ ሰሜት ለኢበጽሐ ውላደም፡ እለ አርደት እት መቅጠነ እንዲ ኢልሄርር፡ እግል ሸሂድ ለሐልፈ ፋርስ ለወድለ ፋርሶታት ሹሀደ ለትሸፊሕ ቅሰት ዐለት። እለ ቅሰት እለ ደሚር ለተምትም ቅድረት ኬትባዩ ለትወሰፍተ ለዐለት። እብሊ ህይ እመነ ክሉ እብ መትዐጃብ ወጣቅዲት ሳርሐዩ።

እብ ክእነ ህይ ለአስቡሕ ዲብ ማይ ድብነት እብ ሸቲል ወሺቀር ዕጩይ ሹሀደ ለአንበተ ወሐር እብ ወራታት ፈን ለአተላላክው በርናምጅ ሹሀደ፡ ምን ማይ ድብነት ዲብ መንዘል ሕሸመት (መዐስከር ደንደን) ክምስል ጌሰኩመ፡ እብ ለትፈናተ ወራታት ፈን እትሰነጡ አምሴኩ። እብ ክእነ ህይ ፈጅር ወምሴ ናይ ዮም 18 ጁን ዲብ ማይ ድብነት ወደንደን ምስል ሹሀዳዩ አጽበሐኮ ወዐልኮ ወአምሴኩ። ዝክር ዲመ እግል ሹሀዳነ!



“ገቢል ልፍዘዕ፡ ልትዝም ወልትሰለሕ” እብ ልብል ሀደፍ ጀብሀት ሽዕብየት እብ ፋይሐት ተአገድዮ ለዐለት ዳይ ዝዞፍ ገቢል፡ እብ ፍንቱይ ሀይ አዋልድ አንሳት ዲብ ቀበት ዐድ ሌጠ ለትወጀህ የዐለ። ጀብሀት ሽዕብየት እግለ እብ ልጃእ ዲብል ትፈናተየ ድወል ፍንጠራት ለዐለየ አንሳት ዲብ ዝዞፍትም እብ መዕጸም ተሐረከት። ምንላ አንሳት ዐባይ ቅቡልየት ወሰዳይት ሰበት ረክበት ሀይ፡ ዲብል ትፈናተየ ድወል ካርጅ ምንላ ተአሰሰ መትዝም ገቢል፡ ለትደቀብ ወአግደ መትዝም አንሳት ቱ ለዐለ። ለሐር መሕበር ወጠን አዋልድ አንሳት ኤረትርየ ለከወነ መትዝም በገ፡ እግለ ዲብ ቀበት ዐድ፡ እብ ገበይ እዳረት ሽዕብ (ጀማሂር)፡ እብ ውሕደት፡ ተሸኪለት ዐድ፡ መሕፈዘት፡ ምዴርየት ልትዝም ለዐለ መትዝምካም፡ ዲብ ካርጅ ሀይ እብ ደውለት-ደውለቱ ልትከወን ለዐለ መሓብርቱ። ዲብ ቅብለት አሜሪካ እግለ መሰል፡ ለመትዝም ምን መዳይን እንዴ ሐልፈ. እብ ደረጀትለ ደውለት ፈይሐ። ዲብ 1977 መሕበር ኤረትርያት አንሳት ቅብለት አሜሪካ እሱስ ክም ዐለ ልትአመር። ዲብ 1978፡ ዲብ 12 ደውለት አርብ ለዐለየ አንሳት ለከምክም መሕበር ልትአሰሰ እት ሀለ፡ ዲብ ድወል ምግባይ ምፍጋር ጸሓይ ወአፍሪቃመ እሊ ለመሰል ፍይሕ ለበለ መሓብር አንሳት እግለ ልትከወን ቃድር ዐለ። እሊ ተጠውራት እሊቱ ሀይ ለዲብ ተእሲስ ኦሮ ወጠንያይ መሕበር ለአሸከተ።

እት 1978 ኤረትርያት አንሳት ዲብ ዐድ ወኻርጅ መሕበር ወጠኒ እግለ ለአሰሰ፡ ሙእተመር ወጠኒ እግለ ሊደየ ልትዳለየ ዲብ ሀለየ፡ እብ ሰበብ መትአታይ እተሓድ ሶፔት ሚዛን ዐሰከርየት እንዴ ትበደለት፡ ሰውረት ኤረትርየ ዲብ መርሐለት ስትራቲጂያይ እንሰሓብ ሰበት አቱት፡ ምስለ ዐለ ሕፋን ቴለል ዐሰከሪ ወድጌ ሰውረት ናይ አሰሰት ንዳል እት ዐመል እግለ ልውዐል ኢቀድረ። ዲሽ ጀብሀት ሽዕብየት፡ ምን ኩሉ ለእሉ ጸብዋ ዐለ ባካት ኤረትርየ እንዴ አንሰሐብ ዲብ ሳሕል ድጌ ሕጠጥ እንዴ አድመነ አተላላይ ሰውረት እንዴ አተበተ ዲብ 1979፡ ምን ቀበት ዐድ ወካርጅ ለመጽአየ፡ ወካይል መሓብር አንሳት፡ ዲብ ድጌ ሰውረት ናይ ጀብሀት ሽዕብየት ሳሕል በሀለት ዲብ አራግ አወላይ ወተእሲሲ

ፍሬ ንዳክ ወኸሰትሽሃድ

ሙእተመረን እንዴ ወደየ መሕበር ወጠን አዋልድ አንሳት ኤረትርየ፡ አሰሰየ።

ልእከት መሕበር ወጠን አንሳት ኤረትርየ፡ እግለ አንሳት ዲብል ድድ እቅጣዕየት፡ እምበራጦርየት ወናይ ከርስ ቤልሰት ሐር እብ ሚርሒት ጀብሀት ሽዕብየ ተሕሪር ኤረትርየ ትገብእ ለዐለት ወጠንያይት ደሞቅራጥያይት ሰውረት እብል ትወቀለት እግለ ልሻርክ አፍዝዖት፡ ዝዞፍት ወሰልሐት፡ ድድለ ዲብ ሙጅተመዕ ኤረትርየ ዓምም ለዐለ አፍካር አበውየት ወድንጉር ዓዳት እንዴ ናደለየ ሕርየት ወመሳዋት አንሳት እብ ዐመል አሲራር፡ እግለ አንሳት ለሽሰስ እቅትሳድያይ ወመሕበራይ ወቃኑያይ መሻክል ሐል ባሰርት፡ ክምስልሁመ ንዳል አንሳት ኤረትርየ ምስል ንዳል አንሳት ዐለም አትአመርት ወአትጸበጦት ለልብል ዐለ።

እሊ መሕበር እሊ ክም ነቲጀት ፈዛዕት ወመትዝም ኤረትርያት አንሳት ወፈዳልየት መሻረከተን ዲብ ሰውረት፡ ዲብ ከርስ ጀብሀት ሽዕብየት ለትወለድ፡ አዋልድ አንሳት ኤረትርየ ዲብ ረይም ናይ ንዳል ታሪክን እግለ ልክለቃሁ ለቀድረየ ለዐበ መትዝምቱ። ዲብ ንዳል ጀለ እስትቅላል ወጠን ልግበእ ወሐቅ ወመሳዋት አንሳት እግለ አከዶት እተ ገብእ ጅህድ ለአግደየ ዶር ሀይ ቀሊል የዐለ።

ለተሐብን ፈራሰት ወንዳል አንሳት ዲብ ንዳል ተሕሪር፡ ዲብ ሐዲስ አው ዘበናይ ታሪክ ገባይል ዐለምኑ፡ ለልትሳነኖ ሐድ ሌጣቱ ለልትረከብ ምን ልትበሀል አትራዛቅ ኢተን። እብ ዐደድ ለአለቡ ምስትንክራት ርዘቅ ሰበት ገብእ ሀይ፡ አትጋራም፡ ዓረርት ወናቀሾት ኢለሐዜ። አኪድ ሀይ ንዳል ሽዕብ ኤረትርየ ጀለ ተሕሪር እምበል ግዴት ወመሻረከት አንሳት በታተን ታምም ወኢገብእ። ሰበት እሊ ዶር ወአካን አንሳት ኤረትርየ ዲብ ታሪክ ሰኒ ቃልየት ተ።

ከእብ ዐመል መሻረከት አንሳት ወለደፍዐያሁ እስትሸሃድ ቃሊ እግለ ዐውቱ ሽዕብ ኤረትርየ አኪድ ወደየ ሌጠ እንዴ ኢገብእ፡ ድንጉር አፍካር ምን ቅርዱ እንዴ መሐ ለክፈዶ፡ እግለ ሰው መዐየ እግለ ልትነደቅ ለገብእ ንዳል ሰኒ ወአማን ቀደም ዋለየ። ዲብ ታሪክ ሐረካት ተሕሪር ዐለምን ሀይ ዛህረት ሰኒ ፍንቲት ተ። ዲብል ትሰደድ፡ እስትሸሃድ ብዙሕ ለደፈዐ እቱ ወሐርብ ድቁብ ገብእ እቱ ለዐለ መራሕል ናይ ንዳል ተሕሪር፡ ሐድ 30 ምእታይት ናይ ሙናድሊን ጀብሀት ሽዕብየት አንሳት ሰበት ዐለየ ለልትደፈዕ ዐውል አክል አዩ ክቡድ ክም ዐለ እግለ ትፍሀም ለልሐይል ኢትን። ናይለ ዲብል ትፈናተ አካናት ዲብ ቀበት ዐድ ወካርጅ እንዴ ገብእየ ዲብ ሐን ዕዛል ጀብሀት ሽዕብየት እንዴ ትዝመየ ናድለ ለዐለየ አንሳት

ኤረትርየ ለዐለት እለን ግዴት ሀይ ምስል ብዕድ መትዝም ገቢል ዶል ልትቃረን ለዐቤት ዐለት።

እሊ ለለሐብን ናይ ታሪክ ዶር እሊ፡ አንሳት ኤረትርየ እግለ ዲብ ናይ አቦይ ነበርይ (traditional role) ክፋሶ ለዐለ ዶረን ዲብ ኩሉ መጃላት እንዴ ፈይሐ፡ ስያህያይ፡ እቅትሳድያይ፡ እጅትማዕያይ ወናይ ዓዳት መትዐዳየን እግለ ለአክደ ለአቅደረየን ቱ። ለዲብ እዋን ንዳል ለተሐሌት “ደሐን ለሀበክ ውሻጢ” ለትብል ሕላየት እምር፡ እግለ አንሳይት ኤረትርየ ለባተከቶ ጀነጅር ለትበይንተ።


“.... ደሐን ለሀበክ ውሻጢ መሕቡስክ ካየድኮ ገርገራክ ሰረርኮ ቀይድክ ባተኮ ረአሼ ረፍዐኮ”

እሊ እብ ሐለት ንዳል ወእስትሸሃድ ቃሊ ወውቅል መሻረከት አንሳት ለተአክደ ተቅዩር አሳሲ፡ ዲብ ሙስተቅለት ኤረትርያመ እንዴ ተረደ ጀላብ እግለ ለአተላሊ፡ ዲብ ሰነት 1994 ለአጅተመዐ ሳልስ ሙእተመር ጀብሀት ሽዕብየት ለፈግረት መስወደት ጀብሀት ሽዕብየት ቀድየት ሕቁቅ ወመሳዋት አንሳት እብ ክእነ ተሌ ውስቅቱ ሀለት።

“... ለክም መክሉቀት ድፈራት ወሐዋኒት እግለ አገዝቡን ተሐት እናስ እንዴ ትትዐለብ ደሀስ ትገብእ ለነብረት አንሳይት ኤረትርየ፡ ድፋን ነብር ለዐለ ናይ ኣደሚ ደቅብ ፈድል ሰውረት ገበይ እንዴ ትፈተሐት እሉ ምን ሐሰሱ፡ ዲብ ትርድት ሙናድለት ትበደለት። ሰውረትን ሀይ እምበል መሻረከት አንሳይት ወኢተዐወተት። እሊ አሰክ እሊ ዲብ ኤረትርያት አንሳት ርኡይ ለሀለ ተቅዩር ሰድር ዐባይ ምንማቱ እግለ ነአማድድ እቡ አለብኑ። ዲብ ኤረትርየ እግለ ውላድ ተብዕን ለትቀተረ እብ አዋልድ አንሳት ለኢልትበጸሕ አካናት እግለ ለሀሌ አለቡ።

እሊ እብ መናሰበት እየቤል ፍዲ እስትቅላል ኤረትርየ ለትጠበዐ ክታብ ንዳል አንሳት፡ ለትከምከመ ቅሰስ ሐጫይር በገ፡ ኤረትርያት አንሳት ድድ እስትዕማር ወድንጉር ዓዳት ንዳል ዕጹፍ እንዴ ናደለየ እስትቅላል ወጠን፡ መሳዋት ፍንጌ ክልኦት ለጅንሰ ወሕቁቅን እግለ ለአክደ ለሐልፈያሁ ሄራር ጽናዕ፡ ለወደያሁ ምስትንክራት ወለደፍዐያሁ እስትሸሃድ ቃሊ እግለ ለአርኤ ለወዋን ቱ። እትሊ ክታብ እሊ ለሀለ ቅሰስ ላኪን፡ እግለ ታሪክ ወፈራሰት አንሳት እብ ከማል እግለ ልሸረሕ ለቀድር ኢትን። እግለ ፈይሐ ወለቀረ ድራሳት ወብሐሰ እግለ ልደርክ ወመበገስ እግለ ልግበእ ላኪን ሰእየት መትዳልየት ተ።

ዓማት፡ ክታብ ንዳል አንሳት





መዳልያይ፡ ኪዳኔ ብርሃኔ
ተርጀመት፡ ሳልሕ ገመ

ዓለ ወመንፈዐቱ ዲብ ዓፍየት



ነበረ እግል ክሉ ክልቀት እብ ሐያት እግል ልዋሰል ለሰድዩ አሳሲ ወእት አወላይ ደረጀት ለልትረተብ ጋርቱ። ለትፈናተ ኖፅ ነበረ ለትፈናተ ማዳት ቅዝእ ሰበት ቡ ለእንበልዑ ዲብ ዓፍየት ገሮብነ ሚ መናፍቆ ክምቡ አመሮት ምህምቱ።

ዓለ ምሮ ምነ ሕሩይ፡ ምን ዘበን ቅዱም እንዴ አንበተ ወድ አዳም ልትመው ለእንሐ ነበራቱ። ዓለ ምስል ምን ብዕድ ሐዋን ለእንረክቦ ሰገ ዶል ልትርእኤ እግል ዓፍየት ምህም ዶር ለቡ አግደ ዴማት ፕሮቲን ወብዕድ መኣዘታት ክም ሽብሕ፡ ሺታሚን ወመዓድን ለቡ ሕሩይ ነበራቱ። ዲብ ዓለ ለልትረከብ ሽቤሕ፡ “አሚገ-3” እግል ዓፍየት ገሮብነ ሰኔ ምህም እት ረአሰ ግብአቱ ለትፈናተ ሕማም ዲብ አንቀሶት ወዳፍቶት ዐቢ ዶር ክምቡ ቢያን እብ ዐመል ለተለ ድራሳት ለአክድ።

ብዕድ ክም ሕርያን ምን አርድ እግል ንርከቡ ለእንቀድር ዴማት አሚገ-3 ክም እንግጥዕ፡ ካዕነ ወሽርናይ ክም ህለ ልትሸራሕ። ምናተ እሊ አዝረአት ክም ካልኣይ ሕርያን ዴማት አሚገ-3 ንትነፈዕ ገብአነ ምንገብእ፡ ምስለ ምን ዓለ እግል ንርከቦ ለእንቀድር ኖፅ አሚገ-3 ለልትቀየሰ ኢኮን። እት ናይ ቀመም ጽበጡመ ልትፈናቱ።

እት ዓለ ለልትረከብ አሚገ-3 ክልኤ ኖፅ ጽበጥ ቀመም መልክ። እሊ ክልኤ ቀመም ዲብ ገሮብ ወድ-አዳም ምን ሕማም መፋሰል እደይ ወእገር ከምስልሁመ ዲብ ዳፍቶት ደቅጥ ደም ዐቢ መናፍቆ ዓፍየት ቡ።

መኣዘመት ሐርሰ ወነብረ ለወዴቱ ክቱብ ድራሳት ክመ ለአክዱ መትመዋን ዓለ ምስል ዓፍየት ለልትጸበጥ ብዙሕ መናፍቆ ክምቡ ዲብ ዳፍቶት፡ አንቀሶት ወሳረቶት ለትፈናተ ሕማም ዐቢ ዶር ክምቡ እግል ልትአክድ ቃድር ህለ።



እት ሐያቶም ነበረ ዓለ ለደጋግኦ አንፋር፡ ምን እሊ እንዴ ተለ ቃርብ ለህለ ሕማም ናይ ዳፍቶት መቅደራቶም ልደቀብ ወልዐቤ፡ ምን ቅሩብ ህዬ ክም ኢልትደም፡ ልትሸራሕ።

1. **ሕማም ልብ ወለስራር ደም**፡ ክል ሳምን ዓለ መትመዋን እብ ለትፈናተ ሕማም ልብ ወደቅጥ ደም ምን መደማፅ ለአድሕን። ዲብ ዐነድር ደም ለኢለትሐዜ መትአካብ ሽቤሕ ዳፍዕ። ለኢለትሐዜ ኮለትሮል ዲብ ደም ዳፍዕ ወለአነድ። ጭብ ዐነድር ደም ሳሬ ወዘያድ ክም ሰኔ ወድዩ። ሰበት እሊ እብ ደቅጥ ደም ወሰድመት ቀልብ ናይ መደማፅ መሻክል ክም ለአነቅሱ እብ ድራሳት ተአክደ።

2. **አዝመ፡ ተወሳክ** ነበረ ለነሰኣ እግሩዝ ዓለ አው ዜይድ ዓለ ክል ዶል ተህየበው ምንገብእ እብ ሕማም አዝመ ናይ መደራር አብኩቶም ጽብብ። ናይ ዳፍቶት መቅደራቶምም ምነ ዓለ ወነቲጀት ዓለ ለኢነሰኣ አግሩዝ ክም ልደቀብ እግል ልትአክድ ቀድረ።

3. **ዕንታት ወዕቅል**፡ ዓለ ርዙቅ ጽበት ቀመም ሽቤሕ አሲድ አሚገ-3 ሰበት ቡ ዲብ ጠወሮት ዓፍየት አሰራር ሐንገል ወዕንታት ዐቢ ዶር ለአገዴ።

4. **ሰረጣን**፡ እት ሰነት 2012 ዲብ ናይጄርያ ለትቀደመ ክቱብ ድራሳት ክመ ለአሸፍ፡ አሚገ-3 ምን ሰረጣን አፍ፡ ሽሕለሌ፡ አምዲት ዐቢ፡ ጥብ፡ ሐፋዘት ቤጭ አው ርሕም ወብዕድ ለመሰል ሕማም ምን 30 አሰክ 50% ናይ መደራር መቅደራት ለአነቅሱ።

5. **ሕማም መትረሳዕ (Dementia)**፡ እብ ዕምር ዐባዩ ላቶም አንፋር ዲብ ሳምን ምን ልውሕድ ሐቱ ወጀበት ዓለ በል፡ ገብአው ምንገብእ፡ ናይ ነፍሲያት መሻክል እግል ልሳድፎም ለህለ መቅደራት ክም ነቅሰ ልትሸራሕ። እብ ፍንቱይ ምን ወክድ ንእሸናሆም ዓለ እብ ንዝም ልትመወኖ ለእንሐው

አንፋር፡ ዲብ ወክድ ዕቢናሆም እብ ለሳድፎም እብር ሐንገል ኢልደም።

6. **ትም ብህለት (ቅዝት)**፡ ዓለ እብ ርቱብ ለበል፡ ናይ ለገብእ ልግበእ ኖፅ ጨቅጥ ዐቅል እግል ልሰብብ ለቀድር እግል ልሳድፎም ለህለ ኡብነት ሐድቱ። ሰበቡ ህመም ምስል ጽበጥ ቀመም አሚገ-3 መጸባጥ ሰበት ቡ። እብሊ ዓለ መትመዋን ዲብ ዓፍየት ሐንገል ምህምቱ።

7. **ሕማም ሰከረ(Diabetic melitus)**፡ አሚገ-3 ዲብ ሳወፕት ቅያሰ ሰከር ዲብ ደም ዐቢ ዶርቱ ለህለ እሉ። እሊ ተውሳክ እብ ዐመል ለተለ ድራሳት ለትሐዝዩ ምንግቱ እግል ሕማም ሽኮር ለቦም አንፋር ዓለ መትመዋን ምህም ክምቱ ሰብ መቅደራት ነበረ ገመ።

8. **ናይ ርእየት መቅደራት**፡ ለልኣጠባዩ እማት ዓለ ለበለዐ ዶል ገብአ ውላደን ናይ ግንሐት መቅደራት ሰኔ እግል ልጠውሮ ሴድያይ ክምቱ ልትሸራሕ። አሚገ-3 ሽብሕ ላቱ አሲድ፡ እብ ገበይ ሐሊብ እም እንዴ ወደ አሰክ ግርዝ ሰበት ለሐልፍ ለተአጠቤ እም፡ ዓለ እብ ርቱብ እግል ትብለዕ ልትሐረ።

9. **ሐሳሰየት ገሮብ**፡ እት አሚሪካ ለገብአ ድራሳት ክመ ለሐብሮ፡ ርቱብ መትመዋን ዓለ ምን ለትፈናተ ሐሳሰየት ገሮብ በህለት ክም ሕማም ቀርቦት፡ መእረር፡ መቀራጥ፡ መሻክል መፋሰል ገሮብ፡ ናይ ከርሰ መእረር ወብዕድ ሕማም ዲብ ዳፍቶት ዶር ዓቢ ለአወቄ።



10. **ወክዱ እንዴ ኢተምም ለልትወለድ ግርዝ**፡ እት ወክድ ዕምሰነ ለትሳወ ዓለ መትመዋን ምን ብቆት አምዕሉ እንዴ ኢተመት ለልትወለድ ግርዝ ዲብ አንቀሶት ሰኔ ምህምቱ። ጽበጥ ቀመም አሚገ-3 እት ወክድ ዕምሰነ ምን እም አሰክ ግርዝ ሰበት ለሐልፍ፡ ዲብ ጠወሮት ሐንገል ናይለ ለልትወለድ ግርዝ ሰኔ ምህምቱ።

11. **ሊኢትዝመ ዐባት ገሮብ**፡ እብ ዕመማይ ዲብ ዓለ ለልትረከብ ሽቤሕ አው ዜድ፡ ክም አውቲዝም ለመሰል ኢጠቢዲ ተጠውር ገሮብ ዲብ አንቀሶት ሴድያይ ቱ። ብርጣንዩን ሰብ መቅደራት ዕልም ነበረ ወብዕዳት ድወል፡ እግል አግሩዝ ለትትህየብ ነበረ ካሬ ላቱ ቅያሰ አሚገ-3 እግል ልትወሰክ ዲቤ ለገብአ ነፈር ምነ ክል አምዕላይ ለልኣሰተህልክ ነበረ ለረክቦ ጣቀት ህዬ፡ ጽበጥ ሽቤሕ አሚገ-3 ምን 0.2% ወለዐል እግል ለህሌ ዲብ መክሮ። ዲብ ለበዝሐ



ለእንበልዐ ነበረ ዓሉ ምን 200-600 ሚ.ግ ለበጽሕ አሚገ-3 ህለ። እብ አሳሰ እሊ ዲብ ሳምን ምን ልውሕድ ምን ሐቱ አሰክ ሰለሰ ወክድ እብ ርቱብ ዓለ እግል ንብለዕ ሐቆ ቀደርን ለለትሐዜነ ቅያሰ እግል ንርከብ ክም እንቀድር ሰብ መቅደራት መክሮ።

እት ዐድነ ለመድ መትመዋን ዓለ ክመ ለትሐዜ ህለ እንዴ ትቤ ለትትሃጌቡ ኢኮን። ወለ ዲብ ግንራራብ በሐር

እግል ሽርሐት፡ ሰልፍ አምዓይት ወሕልቅም ልትወርኬ፡ ለኢለትሐዜ ግሬፍ ወደም እግል ወርከቶት ህዬ ዓለ እብ ሞጅብ እግል ልትሐጸብ ህለ እሉ። እግል ዓለ እብ እንክር ዴጽቱ አው ኩባዱ ዲብ ነአነድፋ ለህነ እንክር እንዴ ቀላብን ምን ረአሱ አሰክ ዘቡ እብ ብልሕት ሰከን እንዴ ቀደድነ እብ ክልኢቱ ክፋል ዴጽቱ እንሰርሰሩ። እንዴ አትሊነ እብ ነዲፍ አግቡይ ፍሌቶ ምን ቀርቦት እንፈንትዩ። እብ ሞጅብ ለትነደፈ ፍሌቶ ዓለ ክም አህምየቱ ወሕርያን መትነፍዐት፡ እብ ለትፈናተ አግቡይ እንዴ ትነፈዕነ ነበረ እግል ነአዓሌ እንቀድር። ለትፈናተ አግቡይ አዳለዮት ዓለ ክም ህለ እንዴ አመርነ ህዬ፡ ፍሌቶ ዓለ እብ ለህለ እግልነ ወለ ለትሐዜነ ቀመም ሐቆ እትቃመምነ እብ ክእኒ ለመሰል እግቡይ ነበረ እግል ነአዓሌ እንቀድር።

ሰንከቶት፡ ፍሌቶ ዓለ ምስል ሐሪጭ ፊኖ ወሐድ በርበሬ ወሌሚን እንዴ ሓበርነ እክል አድሕድ ክም ቅጩ እት ዜድ እንዴ ቀመሽነ እብ ሞጅብ ዲብ ካሬ ሐፋነት ክም ዮብሰ እንወዴ (እሊ ኖፅ ኮተሌት ዓለ በህለት ቱ)።

ቅልወ ዓሉ፡ እግል ልትቃመመ ፍሌቶ ዓሉ፡ እብ ሐሪጭ ፊኖ እብ ገልበቦት ዲብ ለሐፍነ ቅዩሰ ዜድ አው ሐሳሰ ለህለ ዲብ ጠውት እንዴ ቀመድነ ለእንሸቅዩ አግቡይ ቱ። ካሬ ወክድ እንዴ ሀብነ ህዬ ዲብ ቀይሕ ገዱ ክም መሰለ እንክርዩ።

ሽንሬሕ ዓሉ፡ እሊ ህዬ ክም እለ ሐዜነ ቅያሰ እብ ሐድ ቀመም ለትቃመመ ወለ ትጥተክ ሽንሬሕ ፍሌቶ ዓለ እትገብእ፡ እት ሐንቱህ እሳት ለቡ ርባብ ሐጺን ክም ልትቀመድ እንዴ ወዴነ ነአዓለዩ።

እብ ተውሳክ ምሉእ ጥሉል ዓሉ፡ ዲብ ሐድ ፋልሕ ማይ እንዴ ወዴነ ክም ፈልሕ እግል ኒዴ አው ህዬ እብ ሕፋን ማይ እንዴ ወዴነ ነአበሽሉ። ዓለ ለትፈናተ አግቡይ እብ መትነፍቶት ጠምጠሙ ወጽበጡ ዝያድ ክም ልትረዘቅ እንዴ ወዴነ እብ ትሉሉይ እግል ልዓሌ ለህለ እሉ ኖፅ ነብረቱ።



ፍጉር ሚቱ?

ሸባን እብ ሰበት ዓዳቶም እግል ለአምሮ ላዝምቱ፡ ከሰበት እሊ ፍጉር ሚቱ እግል ለአምሮ እትሊ ናይ ዮም ዓሙድ ሸባብ፡ ፍጉር ሚቱ እት ሐንቴለ ልብል አርእስ ለዓለ መክቱብ፡ ምን ክታብ ከዋክብ ለረከብናሁ እብ ሰበት ፍጉር ለሸርሕ ጽበዋ ጣብዓም ህሊን ከቅራኣት በኪተት።

ላሊ ውዑልተ ወአምዕል ፍጉር። ዮም አምዕል በኪተት ተ። ፍጉር ናይር ቱ ማሸኣሉ፡ እንዴ ልብሎ ክል ዶል እንሰምዕ። ከፍጉር ሚቱ፡ ወእግል ሚጉብእ፤ ፍጉር አዳናስ ወትብኔት ሰኔት ቱ። ዮም ፍጉርተ ምን እንብል፡ አምዕል ፈርሐት ወራሐት በህለት ቱ። ፍጉር ትብኔት ሰኔት ቱ ኩሉ ፈርሐኑ፡ ትብኔትን ወሽቅልን ዲብ ፍጉር እግል ኒደዩ ነሐዜ፡ ከፍጉር እግል ሕጼ፡ ህዳይ፡ ክሸቡ፡ መትሎ፡ ሰመይ፡ ርቀይ ህዳይ፡ ሰፈር፡ ዐዲግ ንዋይ፡ ምግዓዝ፡ ዝቤ ንዋይ ወለ መስሎ እግሉ ልትሐፊ። ከፍጉር እብ ኮፎ ልትፈረግ ወእብሚ ልትሐፊ፤ ፍጉር እብ አምዕሎታት፡ አውረሐት፡ ወከዋክብ ልትዐለብ። ለበዝሐ ወቅት ህዩ እብ አውረሐት ወእብ አምዕሎታት ልትዐለብ። ለዕልብ እብ ወሬሕ ወአምዕሎታት እንዴ እንቱመ እብ ከዋክብ ለልእኩዱ ወለ ለአትውዑሉመ ሀለው። እሎም ላኪን ሰኒ ሐዳም ቶም። ፍጉር እብ ከዋክብ ለጉብእ ነፈር ለልአምሩ እንዴ ኢጉብእ፡ እብ ፍንቱያም ዐባዩ ለልትአመርቱ። እብ ፍንቲት እትሊ እዋን እሊ፡ ዕልብ ፍጉር እብ ከዋክብ እንዴ ተርፍ ገይሰ ሀለ። ከአዜ ሰልፍ ፍጉር እብ አምዕሎታት ወአውረሐት ከአፎ ከም ልትዐለብ ንርእ። ሰልፍ ፍጉር ለበን ወፍጉር ለኢጉብእ እተን አምዕሎታት፡ አተላተ፡ አለርበዕ፡ ወአትኒን ተን። አትኒን ዶል ዶል ጠሉቀ ለክልኤ ለህን ላተ ክሉ ክሉ ፍጉር ህዳይ ኢጉብእ እተን። ከእለን ሰለአስ አምዕላት እተ እለ መጽአየ ምን መጽአ ፍጉር ኢጉብእ እተን። ለአምዕላት ለብዕዳት ላኪን እበ ሕሳብ ከዋክብ ወለ ወቅተ ወሬሕ እት ፍጉር ምን መጽአ ፍጉር ጉብእ እተን። እብ ፍንቲት ጅምዐት፡ ሰንበት ንኢሽ ወሰንበት ዐባይ እት ፍጉር ምስል ወሬሕ ወከዋክብ አክልሕድ ምንዲ መጽአ እግል ፍጉር ሰኒ ሕሩያት ተን። ምን አውረሐትመ ፍጉር ለኢጉብእ እቶም ህለው። መዳግን፡ ሰፈር፡ ወረመዳን ፍጉር ለኢጉብእ እቶም አውረሐት ቶም። እሎም ሰለአስ ወሬሕ ፍጉር ኢሳድፍ እቶም እንዴ ቤለው ኢልህዱ እቶም ወክሱሳን ሰፈር ወመዳግን። ረመዳን ላኪን ምስል ሶም ሰበት ኢልዋዕዋም ለአዝዋ ምኑ። እምበል እሎም ሰለአስ ወሬሕ ለአውረሐት ለብዕድ ኩሎም ፍጉር ሰኒ እብ ሕሳብ መጽአ እቶም ምን ጉብእ፡ ጉብእ እቶም። እብ ብዝሐ ህድዩት ለጉብእ እቶም

አውረሐት ላኪን፡ ክልኦት አፈዋር፡ መዕሹራ ወሕግ ቶም። አውረሐት ወለ አምዕሎታት ተ ፍጉር ከም አመርናመ ሕሳብ ለሐዜ።

እት ክል ወሬሕ ለመጽእ ፍጉር ዕለት ወለ ወሬሕ ለመጽእ ፍጉርመ ለአምዕል ፍጉር እግል ትትሐፊ ለአስትህሌ። አምዕል፡ ወሬሕ ወለ ዕለት ኩለን ምስል ሳደፈየ ምን ጉብእ፡ ፍጉር ተምም። ሐቱ ምንን ሐቆ ነቅሶት ላኪን ፍጉር ኢጉብእ። ከህዳይ ለጉብእ እተ አምዕል ፍጉር እብ ኩሉ ታመት እግል ትግብእ ሰልፍ ዕለት፡ አምዕል፡ ወሬሕ፡ ወሐቆሁ ከዋክብ እንዴ ትገንሐ ተምም። ኩሎም እግል ፍጉር ለልትዝሐ ባክ ሕድ እንዴ ሳደፈው ፍጉር ጉብአው ምን ጉብእ እሊ ፍጉር እሊ፡ ፍጉር ናይር ቱ አው ፍጉር ርሒብ ቱ ልትበህል። ፍጉር ናይር ዶል መጽእ ኩሉ እግል ልህዴ ለአምም፡ ህዳዩ እቱ እግል ሊደዩ ጀርብ፡ ለአክሽብ፡ ርቀይ ለቡ ለአትአፊ፡ ወመትሎ ለአምምቱ መትሎ ለህይብ። ፍጉር ለጉብእ እተን ዕሎታት ምን ሰርቀ ወሬሕ ለዐልዮ እለን። ለወሬሕ ምን ሰርቅ፡ ካልእቱ፡ ራብዕቱ፡ ሳብዕቱ፡ ታስዕቱ፡ ዐስር ካልእቱ ዐስር ራብዕ፡ ዐስር ሳብዕት፡ ዐስር ታስዕት፡ ዕስራ ወካልእት፡ ዕስራ ወሳብዕ፡ ዕስራ ወታሰዕ ተን። እትለን ዐስር ወክልኤ አምዕል፤ ለአምዕላት ፍጉር ሳደፈ ዲበን ምን ጉብእ፡ ፍጉር ጉብእ እተን። ምናተ ዕለት ፍጉር ማጽአት እንዴ እንተ ምን ፍጉር ለኢጉብእ እተን አምዕልት ሳደፈት ምን ጉብእ እለ ዕለት ፍጉር ኢጉብእ እተ። እብሊ እት ገሌ ገሌ አውረሐት ፍጉር ልትሐገል፤ እት ገሌ ህዩ፤ ሐዳት ፈጋይር መጽእ ወዲብ ሰሩ አውረሐት ብዙሕ ፈጋይር መጽእ። መሰለን ለወሬሕ አረርበዐ ምን ሰርቅ ፈጋይር ልውሕድ እቱ። ሰበቡ ካልእ ቱ ከሚስ ትጉብእ። ከሚስ ፍጉር ሰበት አለበ ለፍጉረ ሰልፍ ልትሓለፍ። ራብዕቱ ሰንበት ንኢሽ ትመጽእ፡ ፍጉር እግል ትግብእ ትቀድር ትትበህል። ምናተ ሰምበት ዐባይ ወጅምዐት ክልኢተን ተሐለፈየ ከእላመ ብዝሕ ኢልትሐሰፎ እተ። ሳብዕቱ አተላተ ሰበት ትመጽእ ፍጉር ኢጉብእ እተ። ታስዕቱ ከሚስ ትመጽእ እላመ ፍጉር ኢጉብእ እተ። ዐስር ካልእ ቱ ሰምበት ዐባይ ትመጽእ ከእላመ ፍጉር ጉብእ እተ። ዐስር ራብዕቱ አተላተ ሰበት ትመጽእ ፍጉር ኢጉብእ እተ። ዐስር ሳብዕት ጅምዐት ትመጽእ ከፍጉር ብእተ ትትበህል፡ ዐስር ታስዕትመ ሰንበት ዐባይ ትመጽእ ከእለመ እበ ብዕደተ ምን ሳድፍ ፍጉር ጉብእ እተ ልብሎ። ዕስራ ወካልእት አረርበዐ ሰበት መጽእ እሊመ ፍጉር እሊ ልትሓለፍ። ፍጉር ዕስራ ወካልእት አረርበዐ ከልኦቱ ልትበህል። ዕስራ ወራብዕቱ ጅምዐት ትመጽእ እላመ ፍጉር ብእተ ልብሎ ከህዳይ ጉብእ

እተ። ሐቆ እለ ዕስራ ወሳብዕት አትኒን ትመጽእ ከእላመ አለበ ትጉብእ ዕስራ ወታሰዕትመ አረርበዐ ሰበት መጽእ ፍጉር ኢትረከብ እተ። ለወሬሕ ከሚስ ምን ሰርቅ ፈጋይር ብዙሕ ልትረከብ እቱ። ካልእቱ ጅምዐት ትጉብእ እሊ ፍጉር እሊ፡ ፍጉር ናይር ልትበህል፡ ሰበቡ ሰልፍ ጅምዐት ሸረፈት ወሐር ፍጉር ሰልፍ መጽእ እተ እላመ ደርበ ለተሌ ራብዕት ሰምበት እንዴ ገኦት ፍጉር ብዕድ ሰበት ተልየ አያም ፍጉርቱ ልትበህል። ራብዕት ሰምበት ዐባይ ትመጽእ እላመ ፍጉር ርሒብ ተ ትትበህል። ሰምበት ዐባይ እግል ህድዩት ሰኒ ፍቲት ሰበት ተ ወለ ህዳይ ምን ቀደመ ለዐለ ፍጉር ካልእት እንዴ አንበተ አሽቃሉ ለአትጋዴ ሰበት ጸንሕ። ፍጉር አሰር ፍጉር ኩሉ ለአያመ ፈጋይርቱ ለአሰኔን እቱ ልትበህል። እት ክእኒ ለመስል ፍጉር ጋራት አምም ለህለ በዐል ክሸዮ ልግብእ፡ መትሎ፡ ህዳይ፡ ሕጼ ወርቀይ ኩሎም እንዴ አሻፈገው፡ አው እንዴ ጸበረው ጋሮም ወዱ እቱ። ሳብዕቱ አረርበዐ ትጉብእ ከፍጉር ኢጉብእ እተ። ታስዕት ላኪን ጅምዐት ሰበት ትመጽእ ፍጉር ጉብእ እተ። ዐስር ካልእት አትኒን ትመጽእ እላመ ፍጉር ኢጉብእ እተ። ዐስር ራብዕትመ አረርበዐ እንዴ መጽአት ፍጉር አለበ ትትበህል። ዐስር ሳብዕት ሰምበት ንኢሽ ትመጽእ ከፍጉር ትጉብእ። ዐስር ታስዕት አትኒን ትመጽእ ከእላመ ትትሐልፍ። ዕስራ ወካልእት ከሚስ ሰበት ትመጽእ ፍጉር ተ። ዕስራ ወራብዕትመ ሰንበት ንኢሽ ሰበት ትመጽእ ፍጉር ርሒብ ትጉብእ። ዕስራ ወሳብዕት አተላተ ትመጽእ ከእላመ ፍጉር አለበ ትትበህል። ዕስራ ወታሰዕት ህዩ፡ ከሚስ ሰበት ትመጽእ ፍጉርቱ። ከእብሊ ከሚስ ሐቱሁ ለትጉብእ ወሬሕ ሰቦ ፈጋይር ልትረከብ እቱ። እት ገሌ ገሌ አካናት ህዩ፡ አትኒን ክም ፍጉር ሰበት ልትነፍዮ እቡ ዐስር ካልእት ወዐስር ታስዕትመ እት ፍጉር ለአትወን ከሰዕ ፍጉር ወዱ እቱ። እትሊ ምን ዕለታተ ፍጉር ሰለአስ ሌጠ ጀልያ በህለት ቱ።

ለወሬሕ ሰምበት ንኢሽ ሰርቀ ምን ጉብእመ፡ መብዘሐን ሰነብት ፍጉር ጉብእ፡ ወእምበልህንመ ፈጋይር ብዙሕ ልትረከብ እቱ። እሊ ወሬሕ እሊ ካልእቱ፡ ሳብዕቱ፡ ታስዕቱ፡ ዕስራ ወካልእቱ፡ ዕስራ ወሳብዕቱ ወዕስራ ወታሰዕቱ ኩለን ፍጉር ገበኦ። ለተርፈየ ራብዕት፡ ዐስር ካልእት ዐስር ሳብዕት፡ ዐስር ታስዕት ወዕስራ ወራብዕት ፍጉር አለበን ልትበህል። ላመ ብዕዳም አውረሐት እብሊ ገበይ ለዐልዮ እሎም። ለወሬሕ ምን ሰርቀቱ አስክ አምዕል ዕስራ ወታሰዕቱ፡ እት ለዐልዮ እሉ ወእተ ፍጉር ለመጽእ እተ ዲበ ለህዱ ገይሶ። ወሬሕ ክም ሰርቀ ሌጠ እንዴ ኢጉብእ፡ እንዴ ኢሰርቅመ ዮም ወሬሕ ፍላን እግል ልስረቅቱ፡ ዮም ፍላን ምን ሰርቅ ህዩ፡ ለአምዕላተ ፍጉር እት ትለን አምዕላት እግል ልምጸኦቱ፡ እት ልብሎ ምን ቀዳምም ሳቶ። እት ገሌ አውረሐት ፈጋይር ብዙሕ ልትረከብ ወዲብ ገሌ አውረሐት ህዩ፡ ፈጋይር ሐድ ልትረከብ። ዶል ዶል ህዩ እሊ ወሬሕ እሊ ፍጉር አለቡ እቱ፡ ዮምክን እተ አክሩ ፍጉር ርቀይ አው ፍጉር

መበል ልትረከብ ልብሎ። ፍጉር መበል ሰኒ ሐጨርቱ። እተ ዶሉ ዐቅድ እንዴ ጉብእ ለህዳይ ሰበት ልትፈርተክ፡ ፍጉር ሐጨርመ ከፍየ ልብሎ። ርቀይመ ለፍጉር ለሰኒ እግለ ህዳይ ለዐሬ እቡ ሰበት ልትሐፊ፡ ርቀይ እት ፍጉር ሓምቅመ ምን ልትርእ። ጋር አለቡ ልብሎ። መሰለን ምን ዕሎታተ ፈጋይር ዮም ዕስራ ወአርበዕ ወዮም ዕስራ ወሰቦት እግል ህዳይ ብዙሕ ኢልሐርወን። እለን ፍጉር ርቀይ አው ፍጉር መበል ብእተን ልብሎ። ለሰብዕ ሰልፍ በህለት፡ ካልእት፡ ራብዕት ወሳብዕት ሰኒ ፈትወን። ካልእ ፍጉር ለልትሐዜ እለ አምዕለ ዐቅድተ። አምዕል ለዐቅድ እንዴ ጉብአየ ህዳይ እብ እሊቱ ለዐይር፡ ፍጉር ምን ጉብእ፡ ቀደመ ወግራህ ለህለየ አምዕላት ብዙሕ ኢልትሐሰፎ እተን። ምናተ ክልኦት ፍጉር አሰርሕድ ምንዲ መጽ እት ፍጉር እንዴ ሰምደ እት ፍጉር ብዕድ ዐቅድ ምን ወዴ ፍጉር ርሒብ አው ፍጉር ናይር ቱ ልትበህል። ፍጉር ናይር ሰኒ ለልትሐዜ ወለልትፈቱ ፍጉርቱ።

አረርበዐ ለሰርቅ ወሬሕ እግል ፍጉር ብዙሕ ኢልሐርወ ወላመ አምዕሎታት ፍጉር ልውሕድ እቱ። አተላተ ለሰርቅ ወሬሕ ህዩ ፍጉር ርቀይ አው ፍጉር መበል ሌጠ ልትረከብ እቱ ልብሎ። ርቀይ፡ መትሎ፡ ሕጼ፡ ጽምብል፡ ክሸቡ፡ ምስል ፍጉር ህዳይ ፍጉርም ሐቱቱ። እት ክል ፍጉር ህዳይ ጉብእ። ፍጉር ርሒብ ህዩ አክልሕድ ክመ እግለ ህዳይ ልትሐረየ ልትሐፊ እሎም።

ፍጉር ሰፈር፡ ዐዲግ ንዋይ ወዝቤ ላኪን ምን ፍጉር ህዳይ ልትፈንቱ። መሰለን ጅምዐት እግል ህዳይ ፍጉርተ ትትበህል ወእግል ሰፈር ውዑል። ጅምዐት ለጉብእ ሰፈር፡ ነፈር ኢገይሰ እተ። ሰኒመ ለተሐገዝ ለአድህረ ሽሙይ ክምስል በርደት፡ እት ሰፈር ልትበገሱ፡ ለአግደ እግል ዐዲግ ንዋይ ወምግዓዝ ልትሐረየ አምዕላት ህዩ፡ አትኒን ወሰምበት ንኢሸተን። ዝያድ ህዩ አትኒን ትትሐፊ። እግል ሰፈርመ አትኒን፡ ከሚስ፡ ወሰምበት ንኢሽ ሐሩያተን። ጅምዐት ወሰምበት ዐባይ ህዩ ኢሳፍሮ ዲበን፡ ኢልዐድጎ ወንዋይ ኢለአዘቡ እተን። መሰለን ንዋይ እግል ለአዝቡ ዶል ለሐዙ አትኒን፡ ምን እማቱ ለዐዱጉ ከበኑ ዲብ ክልኩል ጸነሐ። ሐቆህ እተ አምዕለ ዝቤሁ ለአዘብወ። ምናተ አዜ እሊ ዓዳት እሊ እት ብዙሕ አካናት ዐድን ዲብ ተርፍ ገይሰ ሀለ። አምዕል አምዕል ረቢተ፡ እተ እለ ረከብክ ህዴ ወገዐዝ ዲብ ልብሎ ዲብ በዝሐ መጽአ ህለው።

ከእብ ዓመት ፍጉር እት 2 4 7 9 12 14 17 19 22 24 27 29 ናየ ወሬሕ ለፍጉር ጉብእ እቱ ክም ጉብእ ረኤን። እትለን ዕለታት እለን አረርበዐ፡ አትኒን፡ ወአተላተ ምን ሳድፈ ህዩ ፍጉር አለቡ እተን እምብል። እምበል እለመ ወሬሕ ወከዋክብ እንዴ አጃገርና፡ ዮም ወሬሕ ፍላን ምስል ኮከብ ፍላን ምዩይቱ። አው ለወሬሕ ፍላን ምስል ባክሕድ ፈግረው፡ እሊ ፍጉር እሊ ሕሎፋ ለልብሎ ሀለው። ምናተ እሊቱ አዜ ዲብ ተርፍ ገይሰ ሀለ። ወለ በዝሐ አዳምመ ኢልትነፊዕ እቡ።

ዴማት፡ ክታብ ከዋክብ

ሹ ሀ ዳ ነ!

ሸሂድ፡ ሸሂድት፡ አይወ! ሹሀዳን ክሎም

ጀላብ እለ ትርበት፡ ኢበደለው ቆሎም

ናደለው እለ ማሌ፡ እግል ሕርየት ሽዕዮም

ወናደለው እለ ዮም፡ እግል ሲያደት ወጠኖም

ይአቅበለው ገጽ ግረ፡ አትመመወ ንዌቶም

ዳይም ታሪክ ሐድገው፡ ውቅል ትግብእ ስሜቶም።

ሸሂድ ለወድ ሸሂድ፡ ረፍዐ ሰይፍ አቡሁ

ሸሂድ ለሐ ሸሂድ፡ አትመመ ፊናሁ

ጀላብ ወጠን አስተሸህደ፡ ምስል ሕቱ ወሐሁ

ሸሂድ ለአብ ሸሂድ፡ ኢከረየ ሞራሁ።

ሸሂደት ለወለት ሸሂደት፡ እግል ሲያደተ ትሰበለት

ወጠንዬ ሰርንዬ ትቤ፡ ከእት ጀላብ ተዐንደቀት

ፊን እመ እግል ተአትምም፡ ግረ ኢትዋለበት

ሸሂደት ለሕት ሸሂድ፡ መንበረት ኢትሸነህት

አስተሸህደት ጀላብ ወጠን፡ ምን ስናተ ዛይደት።

ለሐልፈው ሹሀዳን፡ ምን ልትረስዑ ታሪኮም

ዲብ አልባብ ክሉ ትትብር፡ ለእምር ምርወቶም

ትፋንው እበ ከሐልፈው፡ ‘እግል ኢትትኩመህ ዝሕረቶም

ዋርሳይ አውረሰው፡ እግል ለአትምም እማነቶም

ወራራት እት ጋብሁ፡ ሁቱመ ዐውል ደፍዐ ግራሆም።

ከጋኖም ልስኩብ፡ ሐንቲህ ቃልየት ትርበት

ዐጄተ ሐበንዬ ቤለው፡ ከአትመመወ ለንዩት

ከለበወ እብ ዓጭም፡ ወዝያድ ክሉ አርወሐት

አሸነወ መጦር ስናት፡ ወህተ ዐለት ለሰእየት።

ከእትፋኔኩም ዌርሰት፡ ኢኒህምለ እለ ወጠን

እግል ተዐሬ ስናተ፡ ወዲመ እግል ትሸነን

ትፈረረው አበውት፡ ወአተወ ምን ከደን

እት ጀላብ ሰክነው፡ ለሐንቱ ሐጸ ወእመን

ንወቅል እለ ራየተ፡ ህታተ መስኩብ ሐበን።

ዐውቱ እግል ዝል! ዳይም ዝከር እግል ሹሀዳን!

እግል መሐመድ እድረሰ

ፈርዑን ተበሰም እንዴ ወደ ክም እለ ቤለ።

- ሚራቡ አነ እለ ወቀደክ ሰኔ ክም ዐጅቤኔ ኢትረስዕኮሁ። ምናተ ሞት ለፈቅደ ልትሰራብብ ወልትሰፋለል። አማንተ እለ ወቀደክ ለፈዳብ ለለአክዱ ናይ ደዋም መዓኒ እት አካኑ ሀለ። ምናተ እለ ደዋም እለ ሞት ናይ እለ ለእለ እንፈቱ ፋንዩት እዲናነ ቲ።

ኮሚኒ እት ለአስተንትን እብ ሰባት ወኤማን ክም እለ ቤለ፡-

- መንባዩ፡ ለሐድ ዐተብት ናይለ ዳይመት ሐያት ቲ።

ለመልክ ክም እለ ቤለ፡-

- አማንካቱ ኾሚኒ፡ ምናተ ሰፈር ለአመመ ብዙሕ ለሐሰብ ወለአስተንትን። እለ ህዩ ኩሉ እለ ዳይመት ምግግዝ እለ ለአመመ እግል ልህመሙ ለወጅቡቲ። እለ እብል እት ህሌኮ ፈርዑን ፈርህ አውመ ተአሰፈ ኢልምሰል እትኩ። ኢፋሉ፡ ኢፋሉ፡ ኢፋሉ። አነ ለለአትዐጅብኒ ጋር ሀለ ምን ገብእ እለ እተ ረአሰነ ተአምሆልል ለህሌት ምደት ወአምዕልተ። ከህተ ሙሉክ ኢትብል ወረዕየት ኩሉ እብ ሕበር ትደቅቁ ወትሰምጩ ሌጠ።

አሚር ረዕዮ እለ ፈልሰፈትለ መልክ ሰበት ትዳየገ ምነ ክም እለ ቤለ፡-

- መንባዩ መልክ፡ ሕሳባት ወፍክር ለአበዝሕ ሀለ።

ፈርዑን እት ቀልብ ወልዱ ለዐለት ቃውህ ሰበት ይዐል ክም እለ ቤለ።

- እንተ አሚር ላቱ እለ ልብከ ካርህ ይህለ ወእዘንክ ናስሐተ። አማንዬቱ ሚኢኮን?

- መንባዩ፡ እንዴ ኢተአብዩ እግልዬ፡ ሕሳባት ወመትፈካር ወዘፈት ላግም ቲ። ምናተ አልሀት ጦር ሕክም ወሽመት ለአርፈዐቶም። እለ እግለ ሰቡ እንዴ አዝመው ምኑ ከእብለ ቦምተ ሐለት ወደቅብ እተ ሽኡንለ እዳረቶም እግል ልትፈረር ወጅቡ።

ፈርዑን እት ልተርጀግ ክም እለ እት ልብል ትሰአለዩ።

- ስምዐኒ እንተ አሚር፡ ከአነ አዜ እት አፌት እብር እበጥር ህሌኮ መስለክ?

- ለመለልሂቱ ኩሉም ደናገጸው። ላመ አሚር ምኖም ወለዐል ዝንጉጽ እት እንቱ ክም እለ ቤለ፡-

- እስትቅፋር ብለሰ ይበ!

ለመልክ እት ልተርጀግ። ምናተ እብ አማን ለትመሰል ገበይ ክም እለ ቤለ፡-

- ረዕዮ፡ ደሐን ቱ ብዙሕ ኢትትሻቀል፡ አቡካመ ለሺመት እግል ዲመ ደማይን ሕንኮክ እግል ልግበእ እታቱ ኢልምሰለኩ።


- መንባዩ፡ አነ ሐዲሰትመ እንዴ ይእስምዕ እግል ርሕዬ ምን እድሕርመ ሐቅዬ ቱ መስለኒ።

- መለ አሮት መልክ እግል ልግበእ ላዝም ሐርብ እግል ለዐልን ብእቱ መስለክ?

አሚር ረዕዮ ክልዶል እተ ምሰል አቡሁ ወድዮ ለዐለ ሾረት፡ ዲሽ እንዴ ሀረስ ቀባይል ሲናይ እግል ለአድብ ዳርኩ ዐለ። ከለመልክ እግል ሊበለ ለሐዜ ለሀለ ሰበት ትፈሀመቱ እግል ልሕሰብ መደቲት ትም ቤለ። እት ምግብ እለ፡ ኾሚኒ ክም እለ ቤለ፡-

- መልክ ድቀብ ወሳልሕ ዝያድ ኩሉ ዲብ ሰላም ሕጉዝ ቲ።

ተመህ ቀደር



ለአሚር ሓርቅ እት እንቱ ወለ ገዱ ሰብት ወደቅብ እት ልትረአዩ ዲቡ ክም እለ ቤለ።

- ምናተ ሰያሰት ሰላም እግለ መልክ ምነ ላዝመት ላተ ሐርብ እግል ትክሩዑ ኢትወጅብ!

ለመልክ ክም እለ ቤለ።

- መስአለት ቀዳመት አሰረ ተአምሆልል እርኤኮ ህሌኮ።

- ሰኔ ህሌክ መንባዩ፡ ምናተ እለ መስአለት እለ እግል እትረሰዐ ገበኢኮ ምን ገብእ፡ እት ሰልፍ ለአሰባብ እግል ልብዴ ብዲበ። ቀባይል ሲናይ እተ ምድር ዘማቱ ለአጀሩ ወእሕትራም ሕኩመት ለአነቅሶ ህለው።

- ቀባይል ሲናይ!፡ ቀባይል ሲናይ ትቤ!፡ እለ ሰ'ሪሪም ቅዋት ፖለሲኦ ሌጠ ትከፍዩ ወህተ እብ በይነ አደብ ተአተውድዮም። ጃሽ እንዴ ሀረሰነ እት አፍያቶም እግል ንዓሮም ላቱ አዜዲ ወቅቱ ማጽእ ይሀለ። ለዐድ እለ ናይ ሚራቦ ዳይም ሀረም እት ነድቅ ትዕበት ወእርህቅት ህሌት፡ ምናተ ሐቱ አምዕል ምክራዮም ለነአቀዌ ዲበ ወእለ ዐድ ምን ሽሮም ለተዓርፍ እተ ላቱ ህሌት።

እግል መደቲት ትም ወርሰቶም። ሐቀህ ለመልክ ግንሐት ፈዳቢት እበ እግለ መሕበር እንዴ ከለ ክም እለ ቤለ፡-

- ሕሹማም፡ እለ ዮም ምሴት ለዐደምኮም እቡ ሰቡብ፡ እት ልብዬ ለህሌት ዐባይ ሽንህት እግል እድገም እግልኩም ምን ሐዘኮ ቲ።

ለጀማይዕ ኩሉም እብ ሕሰር አቅመተዉ። ክም እለ ቤለ፡-

- ዮም አሰቡሕ ርሕዬ ትሰአልኮ። ጀላብ እለ መሰር ሚ አውቂት ገብእ? መሰር ህዩ ጀላብዬ ሚ አውቂት? ፈተ'ቼ እንቱም ቱ ወምንኩም ለሐበዐ አለብዬ። እለ ሽዐብ ጀላብዬ ለትጻገመዩ ዕጽፋት ናይለ አነ ጀላቡ ለአውቂኮሁ እንዴ ገበኢ ረከብኩህ። ቅሩብ እብ መጸጸት ሽዐርኮ። አዜመ ብዙሕ ወጀዕ ሀለ ዲብዬ። መዕቡድ ላቱ መውላነ “ሚ” እግል እለ ዐድ ለቅድስት ውሕደቱ ለሀበ ፈቀድኮ። ምናተ ለዐድ አክለ እግልዬ ለወዴቱ ኢወዴት እሉ። ርሕዬ ቀብብኮ። ከእለ ሽዐብዬ ለሰኔቱ እብ ሰኔት እግል እፈንኩተ መሐልኮ ወገለድ አቲ ህሌኮ።

አርቦ ለሚርሓይ ሰኔ ሕሙስ እት እንቱ ክም እለ ቤለ።

- እለ ሕሹም መልክ ለርሐ አፎ ሕሳብ ዐሲር ወደ ዲቡ።

ኹፋ ህግያለ ሚርሓይ ጃሹ ብዙሕ ባልመ እንዴ ኢለሀይብ ክም እለ ቤለ፡-

- ምሉክ ወለ ምን ለዐድሎመ ብዝሓም ዘልሞ። ወዲብ ኬር ወነፈዕ ምን ልትፈረርመ በርዱ ብዝሓም ለአዘ። ከከፋረት ሰይኣት ለገብእ ወከለጥ ለለጽሕ ዳይም ላቱ ዐመል ኹር እግል ልትሸቁ ለአትሐዜ። እለ መጸጸትዬ

ለሐበረተኒቱ ዐባይ መንፈዐት ለብእቱ ዐቢ ወቀይ ራክብ ህሌኮ፡ ለመሕበር እግል ሱኣል አትቃመተዉ። ህቱ ህዩ ክም እለ ቤለ፡-

- ሕሹማም፡ አነ ክታብ እግል አልፍ ሳትት ህሌኮ። ለክታብ ናይ ለባበት ተጃርብ ወምን ንእሼ እፈትዩ ለዐልኮ ምስጢራት ወአሰርዩት ክም ከምክም እግል አውዴ ቲ። እግል ሽዐብ መሰር እት ህዳዩት አርወሐቶም ወዐቂብ ገርቦም ወግፍዮቶም ለሰድዮም ሚራስ እግል ሕደግ እሉም ቲ።

ሚራቦ ሰኔ ፋርሕ ዲብ እንቱ ክም እለ እት ልብል ዐለለ እሉ፡-

- መንባዩ፡ እለ ወቀይ ፈዳብ ቲ። ወእግል ዲመ ደማይን ሽመትክ ወሕሽመትክ ለለአክድ ቲ።

ፈርዑን እግለ መሀንድስ ተበሰም ወደ እለ። ህቱ ህዩ ምን ሐዲስ ክም እለ እት ልብል ወሰከ፡-

- ለቅድስት አክትብትነ ክታብ ሐዲስ እግል ልትወሰክ ዲባ ቲ።

አሚር ረዕዮ፡ እለ ለመልክ እግል ልውደዩ ሳትት ለሀለ ወቀይ እት ዐቅሉ ለአትዳውሩ እንዴ ዐለ ክምእለ ቤለ፡-

- ምናተ መንባዩ፡ እለ ሽቅል እለ ዩም አለበን ሰኖታት እግል ልሕዜ ቲ። አርቦ ለሚርሓይ ክም እለ ቤለ።

- ፋቅምነ ለክታብ እት ቀበት ዕሰረ ሰኖታት ከትብዩ!

ለመልክ ለክልኤ ጣፍሓት ፈወቂቱ እንዴ ነክክ ክምእለ ቤለ፡-

- ምን ዕምርዬ ታርፈት ለህሌት ኩሉ ዲቡ እግል እትከሰእ እግሉ።

ለምልክ እግል መደቲት ትም እንዴ ወደ ክም እለ ቤለ፡-

- ሕሹማም፡ እለ ክታብዬ እት አዩ አካን እንዴ ገበኢኮ እግል እክተቡ ክም ቱ ዳልያም ህሌኩም?

- ፈርዑን ለአግጾት ለልትሰኣል ዐለ እት ለአትቃምት ክምእለ ቤለ፡-

- ቁርፈትለ ታቡት ናይለ ዮም ለደሐርናሁ ሀረም እተ እንዴ ትገሴኮ እግል እክተቡ ቲ።

ለመሕበር ኩሉ ተዐጀበ ወትፈከረ። ፈርዑን ህዩ ክምእለ ቤለ፡-

- እለ ረዋሺንለ እዲነ ዳር አልፈነ ቲ። ወአካን ዳይም ወቀይ ለልትከደም እተ ኢኮን!

ለመልክ መስአለት ለናይ ደንገበ ቀራር ለሀይብ እተ እግል ትትናቀሽ ሰበት ኢፈቱ ለእጅትማዕ ዲብ እለ ተከለሰ። ላመ መሳኒቱ ኩላቶም ትጋዩሰው። ዌርሳይለ ዐራት እተ ዐረብዩቱ ክም ትጸዕነ ሕሙግ እት እንቱ እተ እዝንለ ረኡሰለ ሐረሱ ክም እለ እት ልብል ሐሽክሸኩ፡-

- ፈርዑን ምን ለባበት ወለዐል እግል ሽዕር ፈቲ።

ለመልክ አሰክ ሮሻን መልከት “ሚርቱትፍሰ” ጌሰ። ዲብለ ምትክራረ ምሰል አሚረት “መሪ ሲ ዐንኽ”

ጸንሐቲ። ዕምረ ምን ዐሰር ሰነት ለኢዘይድ ሕት ረዕዮ ቲ። ለአሚረት ክመ ዲብለ ሐማመት እት ትሰዴ መጽአቲ። ወለዕንቱታተ ጸላይም ወግሩማት እብ ፈርሐት ወለውቀት

ለንጨዋርሐ ዐለ። መሪ ሲ ዐንኽ። ለበርህት ወርሕ መሰል ገጽ። ወለሕብር ተመር መሰል ገርብ ወለ ጭሩያት ዕንቱታተ ለልርኤ ምን ሕማም ልትዓፈ። ፈርዑን ፈታሁ ለትሸርሕ ተበሰም ወደ እለ። ወምን ዐለ ዲቡ ሀም ወቀም እበ ረአዩተ አባረ። ነሐሩ እንዴ ፈትሐ አርሐበ እለ ወእተ ሕቅፋ ትከበተዩ።

መርገም ዋልዳይትመ ትገብእ ኢኮን!!

ዐርቀብ እት ሐን እበን አውመ እት አልቃብ ወእት አካናት ጽልሙት እብ በይነ ትነብር። ከምን ብዕዳት ሐሸራት ለፈንትዩ ጋር ህተ እጅትማዕዩት ሰበት ኢኮን። ክልዶል እብ በይናቱ ለትነብር። ክልኤ ዐርቀብ እብ ሱደፍ እት ገበይ ትራክቦዩ ምን ገብእ፡ ልትበአሰ ወለበአሰ ላዝም እብ ዐውቱ ሐቲህን እግል ልትመም ብእቲ። በህለት ለዕውትት እግለ መልሆዩ ላዝም ትቀትለ።

ዐርቀብ አንስ ወዐርቀብ ተብዐት ትራክቦዩ ምን ገብእ (ዐረቅብ እብ በን በንን ሰበት ነብራ እለመ እብ ሰደፍ ቱ) ዐመልዩት ህዳይ (ጅማዕ) ትሐሰል። እለ ጅማዕ እለ እብ ረደ እንዴ ኢገብእ እብ ቀሰብ ወእብ ሐለት ቱ ለተምም። ለአንሳይት ወለተብዐት ዶል ለእለ ሕድ ሰድፎቲ። ክመ እተ በአሰለ አብዕረት ገጽ እብ ገጽ ሕድ ለሀድህደ ወሕድ ናዝዮ። ለአንሳይት ረሐ ትከልእ ወለተብዐት ምራዱ አሰክ ረክብ ዐደድ ሐለቱ ልትጻገም።

እት ደንገበ እብለ እደዮም ሕድ ለሀድህደ ወሕድ ጆርጅር እንዴ ዐለው። ለተብዐት ለዘርኡ እተ ምድር ሽይኑ ወእግለ አንሳይት እንዴ ሰሐቦዩ ክም ትትለበኩ ወድዮ፡ ወእብለ ገበይ እለ ዐመልዩትለ ጅማዕ ተመት በህለት ቲ። ሐቀ እለ ለተብዐት ሐለቱ ሰበት ተሐውን ምን እዳለ አንሳይት እግል ልትፈርቀቅ ኢቀድር። ከህተ ህዩ እትለ አካኑ እንዴ ቀትለቱ ትበልዐ። ወህታመ እበ ዘርኡ ለእሉ ትለበኩት ትጽብጥ ወው'ላድ ትወዳ።

መደትለ ምቅርብናህ ክም ተመት ትወልድ፡ ወለ ውላደ አሰክ ሽንግሎ ህምቦኦ ትወድዮም ወምነ ዓጻተ ላለ ልግበእ መአምዕል በታተን ኢትከርዮም። ህቶም ህዩ ሐቀ እለ ሕንቃቂሆም ክም ሽንገለው ወሰነት ታመት ዐርቀብ በጽሐው። እግለ እሞም እብ ሕያዩ እት እንተ እተ ረአሰ ጽዑናም እት እንቶም በልዕው።

እለ ሰገ እሞም ክም በልዐው ግድም ምርት ተ ከእለ ገበይለ በይን ወለጽልመት ለአነብተ ወሽተን በተን ገብኤ። ምርት ከእብ በይኑ እት ጽልመት ነብር ወሱደፍ አትራክቦዩም ምን ገብእ ክም እለ ለዐል ለትዘከረ ተዩልል እቡ ለሐልፎ። ሕድ ለአፈቱ ወህዳዮም እግል ሐቱ አምዕል ሌጠ ገብእ። ለተብዐት አምዕል ህዳዩ መይት እትህሌ፡ ለአንሳይትመ ዐመለ ፈግር እተ ከክመ ህተ እግል እመ ለወዴት ህታመ ውላድለ ርሕመ በልዕው።

ከእለ ዐርቀብ እብ በይነ ምርት ረእሰ እት እንተ እት ጽልመት ለትነብር እበ ወሐር አከይ ሞት ለትመይት እበ ምስምስ መርገም ዋልዳይት ተ ገብእ! ከምን ቀደብ ዋልዳይ ትደገን።

ተበሰም

• ምርት ነፈር ነብረ ዲበ ዕንል እት እንቱ ጋሻይ መጸዩ፡ ወአሰላም ዐሌኩም ቤለዩ። ዐሌኩም ወ'ሰላም በልሰ ዲቡ። ምናተ ቀደም በል አርሕብ ኢቤለዩ። ትም እት ልብል ልቡ እተ ነብራሁ ሌጠ ወደዩ። ለነፈር ህዩ ምነ ነብራሁ ቅሩብ እግል ልሻቅሉ ሰበት ነወ ክምእነ ቤለዩ።

- “እት ገበዬ እብ ዐድክ ሐለፍኮ።”

- “እላቲ፡ ከእት ገበይክ ዐለው ኢኮን” ቤለዩ።

- ለጋሻይ ህዩ አዜመ፡ “እሲትክ ዐምሳት ተ” ቤለዩ።

- ህቱ ህዩ፡ “ዐቢ እለ፡ ከበረ ዐለ እዩ” ቤለዩ።

- ለጋሻይ ህዩ፡ ከወልደት ማሸአለ ትፈረጀት” ቤለዩ።

- ለእናስ ህዩ፡ “ከኖሳመ ዐምሳት ምን ተዐሌ ገበያተ፡ እምበል ትወልድ ሚኢኮን። ቤለዩ።

- ህቱ ህዩ፡ “ማሸአላ ወተባረከለ መነቲት ወልደት” ቤለዩ።

- እላቲ፡ ዋልዳይተ ክምሰልህ ዐለት” ቤለዩ።

- ለጋሻይ ህዩ፡ ከረቢ ሰብር ለሀበክ ለምርቶም ሸፍዐ” ቤለዩ።

- ህቱ ህዩ፡ “ሰኔ ሌጠ ረትዑ፡ ሐለት ክልኢቶም ተአጠቤ እበ ላተ ህታመ ይዐለት ዲበ” ቤለዩ።

- “ላመ ሓርያይ ላተ ዐረዩ” ቤለዩ።

- “ከሐቆ ሞት ሐሁ ለእዲነ ሚ ካሪ እተ ዐለ፡ አማኑ ቱ ሰኔ ኬደ” ቤለዩ።

- ለጋሻይ አዜመ፡ ላማ እሞም ግድም ጀነት ወረሕመት ለአትባርዳህ ሌጠ ህታመ ሞተት ኢኮን። ቤለዩ።

- ህቱ ህዩ፡ “ኣላህ ሐዘን እትለ ውላደ ወደያተ መስኪነት ከሚ ቲዴ” ቤለዩ።

- ለጋሻይ ህዩ እብ ኩሉ ክም ተሐለለ ምኑ እት ደንገበ፡ “እለ ነብራክ አክል አዩ ጥዕም ህሌት?” ቤለዩ።

- ለእናስ ህዩ፡ ከምን ጠዕመት ሌጠ ቱ ለእብ በይንዬ እበልዐ ህሌኮ፡ ወእብ ረቢ ትግበአኒ አጠምጥመክ ምናመ ኢመስለኒ” ቤለዩ።





ነፈሰ ወድ ዕትማን

ዓዳትን ነኣምር


ነፈሰ ወድ ዕትማን ወኢኖ ሊትማን እብ ክሰራሰሩ ሓልዮት፡ ዓዳት ወኢኖ ትግራይት እተ ወደዉ በሐሰ ወድራላት፡ ክምሰልሁመ እት ደረጀት ጥባባት ለኣብጸሐው፡ ከዮም ክብት ትግራይት እግል አጅያል ለሓዲስ ጋብእ ለህለ አክትባት፡ እግል መጽእ አጅያል መትሃግየት ትግራይት ዝሕረት ዐባይ ቱ። ነፈሰ ወድ ዕትማን ወኢኖ ሊትማን ህዩ ዲብ ተእሪክ፡ ዓዳትን ወሕላይን ለኣግደዉ ዶር እብ ቀሊል ለልትረኡ ኢኮን። ከሰፍሐት ፈን ወግዳት እሊ እት አክትባት በዲር ለህለ ርዝቅ ህግያን ክሉ ኣዳም ጀላብ እግል ልርከቡ፡ ለኣምሩ ወልትነፈሰ እቡ፡ እትሊ ዓሙድ እሊ ምነ ብዞሕ ጽብጥለ አክትባት ዲብ ነሐሬ እንቀድም እኩም ህሌን። ከእግል ዮም'መ ምን እሊ አክትባት እሊ ለኣዳሌናሁ ጽብጥ ጀበእ እምለኩም፡ ከቅራኣት በኪተት፡



ኢኖ ሊትማን

እዲ ኖስ

እብ ሓላት አቡሁ ኤማኑ ለትሰለበ እናስ አምዕል ሐቲ እግል እብ እብር ዱዩስ ለዐለ አቡሁ ህምብኦ እንዲ ወደዩ በካት አመቅረብ አሰክ ከደን ጌሰ እቡ። ምነ ድጌ እንዲ ሬመ ህዩ ሸንክት ኦሮ ሕሊል እንዲ ሸክራ፡ ምነ ዐድ ክም አሬመ እብ ረአሰ




ቅራር ሸበ እቡ። እሊ ወክድ እሊ ለህምብኦ ጋብእ ለዐለ አብ እብ ሰሓቅ በረቱቅ ገብኦ። ዲብ ተእሪኩ ሰሐቅ ለኢለአምር ሰሓቅ ህዩ ሰሐቅ፡ ለህምብኦ ዋዲሁ ለዐለ ወልዱመ እብ ሰሓቅ አቡሁ ሰበት ትፈክረ፡ “አፎቲ ይበ? አፎ አክል እሊ ትሰሐቅክ?” ዲብ ልብል እግል አቡሁ ትሰአሊ። ለኣብ ላተ ልሳዕ ዲብ ልሰሐቅ “ደሐን ጣይ-አቡክ ዲብ አርወሐቺ እሰሐቅ ህሌኩ። እንታዲ ቀረድክ አግዲ” ቤለዩ። ለእናስ ህዩ ነፍሱ ሰበት ኢወዲት እግሉ፡ “ላላ፡ ይበ በሰ አሰእሲኒ እብ ሚ ትሰሐቅ ህሌክ?” ትሰአለዩ ምን ሐዲሲ።

ለድግለል ህዩ ለተአሰሕቅ ዐለት ጋሪት ክእነ ዳገመየ እግሉ፡ “እተ ዘበን ቅዱም ቱ ወልዩ፡ ኣነ ንኡሽ ዲብ ኣነ ክእነ ክምሰልክ ደንኪብ ወበዐል አክይ-መዋዲት ዐልኩ። ህግዩ ዋልዲንዩ በታተን እሰሚዕ ይዐልኩ። ዋልዲንዩ ደለ ቤለወ ህዩ እዝን ጽምት ህይበ ዐልኩ፡ ዲብ ተእሪክሎ ሐቲ አምዕል እግል ዐባይመ ሕሹም ይኣነ። እዲዩ ክሪት ዐለት። እብ ሐሰት ንሳልዩ እለዋሌ። እብ ፍትነት ግዋሬ እፈናቲ ዐልኩ። እብ ፍንቲይ ረቢ ልሳመሐኒ ዲብ ኢኮን እግል እምዩ ወአቡዩ ሕሹም ይኣምር። ዋልዲንዩ ረቢ ልርሐምም ደለ ህቶም ቤለውኒት ክእነ ክምሰልክ እዝን ጽምት እንዲ ህይብ ለደንክበት ወለትመክረህት ሌጠ እሸቂ ዐልኩ።

እብሊ እወድዩ ለዐልኮ አክይ መዋዲት ህዩ መርገም ዋልዲንዩ ድራርዩ ወጸብሕዩ ዐለት። ዘመን ሕድ ዲብ ጌልል ወዋልዲንዩመ ዲብ ለዐቡ ወደግልሎ ምንመ ጌሰው ምንዬዲ ሰዳይት ራክባም ኢኮን። እግልሚ ህቶምም ሓለቺ ተዐጅቦም ሰበት ይዐለት ረቢ ልርሐምም ሐቲ ምዕል ሰኔቺ እንዲ ኢልርኡ ቤት አማኖም አተው። እምዩ ሰኔቺ እንዲ ኢትርኡ ትረሐመት። አቡዩ ላኪን ረቢ ልሳመሐኒ፡ ዘንቡ ድብዩ ህሊ። የምክን እሊ ኣዜ እንተ ኣሙ-እግልዩ ለህሌክ ቀብር ዝንብ አቡዩ ገብኦ።

አቡዩ እንዲ ደግለለ እብ እብር ዓጻቱ ክም ትክርክረት፡ ለእግል እርፍው ወእራዕዩ ልታኬኒ ለዐለ ውላዱ ኣነ ዲብ ኣኩ ክእነ እንተ ትወዲኒት ለህሌክ ሕሰሩ እወዲ ይዐልኩ። ህቱመ ጽብርዩ ሰበት ዐለ እግል ረቢ ወደዩ አሰበረ። ምናመ እብር፡ ድብር ሰበት ሓለዩ አርወሐቲ ገፍ ትቤ። ዕንታቱመ ዲብ መንሽ ጌሰ። ሐቆ ገሌ ሰኖታት ህዩ ላመ ዲብ ልትመረሕ ሸንቱ ከደን ለአበጽሕ እቡ ለዐለ ዕንታቱ ተሐጀቡ። ከሐዋኒቱ ከረ ወክለ ለመስኡልየቱ ዲብ መሸንገልዩ ትክሬት። ምን መስኡልየቱ እግል አባሬ እንዲ እቤ፡ ረቢ ለልኡብዩ ጎማት ገማኒ። ክምሰል እሊ ኣዜ እንተ ትሐሰበ እግልዩ ለህሌክ አክይ-ጎማት ገማኒ። እንታመ አማን ተሐይሰ መስኡልየት ርፍዐቺ ርይሕትክ ክም ህሌት እሙር ቱ።

“እብሊ ቴለል እሊ ንዩቺ ክምሰል ሐጭረት፡ ዝንብ ፈንጎሕ



እንክር እንዲ ከፊት ሐቲ ምሴት ክእነ ኣዜ እንተ ህምብኦ ዋድዩተ ለህሌክ ህምብኦ እንዲ ወዲኩወ ሸንክት ከደን ረትዐኮ እቡ። ምነ ዐድ ክምሰል ሪምኮ ምነ ሕቀቺ ዲብ

ምድር ሐደርኩወ። አዳም እግል ኢልርኡኒ እንዲ እቤ ህዩ ዲብ ሕግስ ኦሮ ቅራር ከሬኩወ ወእባዩ ለሃርእ ቅራር ሀገፍት ዲቡ። አቡዩ ዋልደዩ እብ እዲዩ ቀተልኩወ። ለናይ ፈንጎሕ ልትበህል ዝንብ ህዩ ፈንጎሕ ኢጸንሐ፡ እሊቱ ዐረ እብዩ።

እለ እንተ አክል ሕድ ክምሰለ ኣነ ቀደም ብዙሕ ሰኒን ዲብ ረአሰ አቡዩ ለዐመልኩወ አክይ-ዐመል እግል ትፍዲኒ እንዲ ትቤ እንሰር አብጸሕከኒ። ኣዜ ህዩ ጣይ አቡክ እንተ ሓሰበ ለህሌክ ውዴ። ኣነ ህዩ ውዴቺ ቀዳሚት ሰበት ፈቀድኩቱ ለትሰሐቅቱ። እለ ክለ ሓሰበ ለህሌክ ኖሼ እት ረአሰ አቡዩ ዋዲህ ሰበት አናቱ ኣዜ ዘርእዩ እበትክ ህሌኩ። ለሐርሰ ኖሱ ዘርኡ በትክ። ዝንብ ህዩ ፈንጎሕ ጸኔሕ ይህሊ። ኣነ እትለ ለካሬተኒ እዲ ኖሼተ ወእዲ ኖስ ህዩ ብርድት ቅርት ቱ።”ቤለ ለሰሓቅ ዲብ አስተንተኖት ወትዕሰ ብዱሉ ዲብ እንቱ።

እሊ ወክድ እሊ ለአቡሁ እግል ልቅተል ወዲብ አቡሁ ቅራር እግል ልህገፍ እሙም ለዐለ እናስ ለውዲት ለአቡሁ እት ረአሰ እብዕቡ ለአጅረየ እት ገዱ ሰበት ትጋየሰት እሉ ክመ ንኡሻይ እብ ብካይ ፍዋሽ ወደ። ለሐሰበ ዐለ አክይ ውዴት አተዐሰቱ። እግል ድግለል አቡሁ ዲብ ምድር እንዲ ከረዩ ዲብ ደምእ እብ ሓሰበ ለዐለ ውዴቱ ተዐሰ ወአስተንተኑ። ምነ አቡሁ ለሓከዩ እሉ ቅሰት ህዩ ብዙሕ ደርሰ። ዲብ አቡሁ እግል ልህገፍ ሓሰብ ለዐለ ቅራር ህቱመ ፈንጎሕ ክምሰል አበረ ወደግለለ ውላዱ እግል ኢልፍደወቱ ፈርህ።

ህቱመ ክም ዋልዳዩ ዘርኡ እግል ኢልብተክ ህመት በኣቱ። ሐቆ እለ ዲብ አቡሁ እንዲ ትወለቡ፡ “ይበ ሐሰብክ ሳመሐኒ! ኣነ እለ ይኣምሰልኩ። እንተ ዘርእክ ሐቆ ትበትክ ህሌክ አናመ ፈንጎሕ ዘርእዩ እግል እብተክ ቱ። ኣዜ ህዩ ምነ ሓሰበ ለዐልኮ አክይ ጎማት ቶቤኩ። እንተ ህዩ ሕኔት ሀጊፍ ቅራር፡ እት ረአሼ እግል ኢጽረኩቱ። እግል እራዲክ ወእግል እርፈዐክ ቱ። ሳመሐኒ! ሳመሐኒ ይበ!” ቤለዩ ወምን ሐዲሰ ህምብኦ እንዲ ወደዩ አሰክ ቤት አቅበለ እቡ ወአሰክ ቤት አማኑ ለኣቱ እብ መርዲት ወከባኩብ አንበረዩ ልትበህል።

ምን ሐልየት ቀዳምያም


እት ህግያ ትግራይት ሕላይ ክመ ሐዜክ ትፈሰሩ። ድመልክ ትሸሬሕ እቡ፡ ፈርሐትክ ትፈሰር እቡ፡ ወሰኣልመ ምን ልትወጀህ እትክ ለእሉ ትሰአለውክ ሰኣል ትበልሰ እቡ። መሰለን ግዱፍ ለልትበህል ሕልደይ ምን ሐባብ ዐድ ህብቴስ እሲቱ ምን ሐድጋ፡ ሕመድ ለልትበህል መስኒሁ ህዩ ለሕድጎ ሰበት ኢረደዩ እሉ፡ እት እሲቱ እግል ለአቅብል ደከለዩ። ግዱፍ ህዩ እግል ደኪለት መስኒሁ ሕመድ እብ ክእና በልሰ እተ፡

እንዲ ድዌ ወሕመድ - ለደኪለቺ ምን ተሐዜ
ሐርማዝ እንዲ ዳበረ - እብ ሓልቦትት ምን ኣቱ
እርወት እንዲ ትገበለት - እት ኣሐ ነጹፍ ምን ትትገርጃ
ሐየት በዐል ኣሐ ምንገብእ - ከመሐልክ ወዕቅት ምን ወዲ
ህመም ዐጣል ምን ለአውዕል - ወለትጸረረት ምን ጠቤ
ሀርደ ለዐል እንዶ ትደርገገ - ከእት ስጋደት ምን ተኪ

ወሐዝ እንዶ አቅበለ - ከእት ረወሪት ምን ለአሰቱ
ወዐስተር ጋድም ምን ትገብእ - ከአድሁይ እለ ምን ኣቱ
ዎ ጋድም ዐስተር ምን ገብእ - ከዐሬዴን ምን ተኪ
ወበይሐት እትዩ ምንገብእ - ከመድህን እተ ምን ኣቱ
ወድ ሐሸል እንዶ ትሸዩመ - ከእብ ዋንጫታት ምን ሰቱ
ዐንዳይ አመት ምንገብእ - ከከልዴተተ ምን ተኪ
ከራይ አዱግ ምን ተአውዕል - ከሸእ ትብል ወትክርሴ
ወገርዋ ብዕራይ ምንገብእ - በዐልቱ ቀሐተ ምን ትወዲ
እለ ኢገብእት ምንገብእ - ሐካዲ ለቤተ ኢኣቱ።

ወእብለ ሕላየቱ ግዱፍ እግል መስኒሁ ሕመድ እት እሲቱ ክም ኢለአቀብል አጽበረዩ ወአበ እሉ ልትበህል።





እት ሻምፕዮን ጅግረ-ዐጃለት 2023፡ ዐወት አማኝ ተዐወተ

13ይት ደውረት ሻምፕዮን ጅግረ ዐጃላት ኤረትሮፕ: ለሐልፈት ጅምቦት 23 ጁን ዲብ ድዋራት ማይ-ድምነት እብ ናይ ወቅት ጅግረ ሸፋገት አንበተ።

እትሊ ጅግረ ወቅት፡ ዐባዩ ወምንኣሽ 23 ሰነት መትጃግረት ምን ውላድ ወአዋልድ ዲብ ክልኤ ዱረት ለተምም ናይ 36 ኪሎ-ምትር መሳፈት ዲብ ትጃገረው። ዲብ መከላከል ጅግረ ህዩ፡ አሎምፕያይ መትጃግራይ አማኝኤል ገብሬአዝጋብሄር እት ሳዐት 50.1 ኪሎ-ምትር ዲብ ልትፊተት እብ 43 ደቂቀት፡ 4 ሳንዩት ወ10 ንኢሽ-ሳንዩት ጅግረሁ እንዴ አትመመ፡ ለሸፍገ መትጃግራይ ናይ ሰነት 2023 ገብእ እት ህለ መዳልየት ደሀብ ወለትወቀለት ጃእዘትሊ ጅግረ እብ ልትነሰር ዲብ ህለ፡ አሎምፕያይ መትጃግራይ መርሃዊ ቅዱስ ምን አማኝኤል እብ 1 ደቂቀት ወ 11 ሳንዩት እንዴ ተአከረ 2ይ፡ መትጃግራይ አኽሊሉ አረፋይኔ ህዩ 3ይ እንዴ አተ፡ መዳልየት ወርቅ ወነሐስ ተህየበው።

ደፃም ዲብ ድዋራት አቅብር ሹህደእ አስመረ ዲብ ክም እለ ናይ ዮም ዓመት መሳፈት ለገብእ ናይ ወቅት ብድረ ዐጃላት ዲብ መዳልየት ነሐስ ናስእ ለዐለ አማኝኤል ገብሬአዝጋብሄር፡ ዮም ዓመት ካልእ ኢነቱ ለሸፍገ ኤርትራ መትጃግራይ ጋብእ ህለ።

ዮም ዓመት ዲብ ራብዓይት መርሐለት ጂሮ ዲኢታልየ 6ይት-ደረጃት እንዴ አተ ለሐስ መትጃግራይ ናይለ መርሐለት ለነሰአ አማኝኤል፡ ሐቅለ ጅግረ እት ሀባዩ ሸፊሕ ሰሐፊ፡ እት ሳዐት 50 ኪሎ-ምትር እንዴ ከይድ ጅግረሁ እግል ለአትምም ክም ኢትአገመ፡ አዜ ህዩ በቃዐቱ እግል ለአርኤ መዳሊቱ ዋዲ ክም ህለ ለአክድ።

እትሊ ናይ ወቅት ጅግረ ዮም ዓመት፡ እት ናይ ምተሐት 23 ሰነት መትጃግራይ ፈሪቅ ዐጃላት ቤልጅዩም- ኢንተር ማርሼ ለህለ አኽሊሉ አረፋይኔ ቱ መዳልየት ደሀብ ለነሰአ። ናይ ለሐልፈት ሰነት ዕዉት ጴጥሮስ መንግስ ምን ናዲኤል ወርቅ፡ ናይ ፈሪቅ ዐጃላት ሰምበል ሄብሮን ብርሃኔ ህዩ መዳልየት ነሐስ ናስኣም ህለው።

ምን መትጃግረት ኤሊት ወምንሐት 23 ሰነት አዋልድ ህዩ፡ መትጃግራይት ናዲ ደንደን ናይ ውዛረት ድፋዕ አድያም ዳዊት ተ ለትዐወተት። ብርኽቲ ፍሰሃዬ ምን ናዲ-ጋላ-ነፍሐ መዳልየት ወርቅ ትነሰእ እት ህሉት፡ ናይ ናዲ አቅሊም ግብለት ሞናሊዛ አርአየ ህዩ መዳልየት-ነሐስ ካስበት ህሉት።

ሻምፕዮን ጅግረ ዐጃለት ኤርትሮፕ ሰነት 2023፡ ማሌ-ለሀ ቀዳሚት ሰምበት ዐባይ 25 ጁን ምን ሳዐት 7፡30 አስቦሕ እንዴ አንበተ እት ዐባዩ-ሸዋሬዕ አስመረ እብላ ገብእ ጅግረ-ትሩድ ተመ።

እግል መንገፎለ መትባድረት ምን ሐረከት አዳም፡ መካይን ወዐጃላት ለነገ ደለ ህቶም ከዩዱ ሸዋሬዕ አስመረ፡ ለሐስ ንዛም ወእብ ሸዑር ተእዩዶም ለሸርሐ፡ ሸባብ፡ ዐባዩ ወነኣይሽ ለትረግሐ ዶል ትርእዩ፡ ጅግረ ዐጃላት እት ኤረትሮፕ ክም ዓዳት ሰብቅ ክም ህለ ልትረኤከ።

መትጃግረት ኤሊት ወምንተሐት 23 ሰነት እት ወደወ ጅግረ-ትርድት፡ ናይ 174 ኪሎምትር ጅግረ፡ መትጃግራይ ፈሪቅ ዐጃላት ደንደን ዐወት አማኝ እግል መትጃግረቱ እንዴ በድረ ዕዉት ሻምፕዮን ኤረትሮፕ ሰነት 2023፡ ክምሰልሁመ ናይ ምተሐት 23 ሰነት ለሐስ መትባድሪ ዐጃላት ኤረትሮፕ ገብኦ።

እትሊ መትጃግረት እት ሳዐት 42 ኪሎምትር ዲብ ልትፊተቶ ለአትመመው ብድረ-ዐጃላት፡ እት ዲብ ማይ ድምነት ለገብእ ጅግረ ወቅት መዳልየት-ወርቅ ለነሰአ ምን ፈሪቅ ዐጃላት ኤራቴል ጴጥሮስ መንግስ፡ እግል ካልእ ዶሉ 2ይ ተርቲብ ናይ ምንተሐት 23 ሰነት ጸብዋ እት ህሉ፡ ፕሮፌሽናል መትጃግራይ ፈሪቅ ዐጃላት ኢጣልየ ባርዲዲ ለህለ ሄኖክ ምሉእብርሃን ህዩ መዳልየት ነሐስ ራክብ ህለ።

እትሊ መደት ጎነ እብ መርከዝ ተእሂል ዩ.ሲ.ኣይ ናይ ጅግረ ዐጃላት ምህሮሁ ታቤዕ ለህለ ዐወት አማኝ ግራለ ሰጅለየ ዐውቴ-ሐበን ዐባይ ዲብ ሀባዩ ረኣይ፡ አስክ 130 ኪሎ-ምትር እግል ጅግረ-ድኢኮን፡ እግል ሰዐይ ፕላተ ጣምዐ ለዐለ ሐሊቱ፡ እብ ምክር መምህሩ እት

አክር እብ በቃዐት ትነፈዐ እብ።

ወድ 20 ሰነት መትጃግራይ ዐወት አማኝ፡ ሻምፕዮን ኤረትሮፕ ምንተሐት 23 ሰነት እንዴ ገብኦመ 2ይት መዳልየት ደሀብ ነሰእ ዲብ ህለ፡ ጴጥሮስ መንግስ ወርቅ፡ አኽሊሉ አረፋይኔ ህዩ መዳልየት-ነሐስ ትሰርገው።

ዲብ ጅግረ ዐጃላት አዋልድ ህዩ፡ መትጃግረት ናዲ ሰራይር ሳወ ለትወቀለት በቃዐት እት ለአርእዩ፡ ለጅግረ እብ ዐውቴህን ቱ ለተመ። ምን ፈሪቅ ብድረ ዐጃላት ሰራይር ሳወ፡ ቅሳነት ወልደሚካኤል ዲብ ናይ ኤሊት ወምንተሐት 23 ሰነት መዳልየት ደሀብ ትነሰእ እት ህሉት፡ ካልኣይት ምን ፈሪቅ ደንደን አድያም ዳዊት መዳልየት ወርቅ፡ ወሳልሳይት ፌሽን ህይሌ ምን ፈሪቅ ሰራይር ሳወ እብ ክልኤቱ ተርቲብ መዳልየት ነሐስ ረክበት።

እምበል እሊመ፡ ዲብ ናይ ጁንዩር አዋልድ ሮምና ጉዕሽ ትትዐወት እት ህሉት፡ 6,000 ናቅፈ፡ መዳልየት ደሀብ ወእግል ሓል ለትለብስ ፍሌንዩት ሻምፕዮን ሰነት 2023 ናይ ምንተሐት 23 ሰነት ሰርጊት ህሉት። ምን ፈሪቅ ዐጃላት ደንደን ላቱ ሚሮን ምስግነ መዳልየት ደሀብ፡ 6000 ነቅፈ ወሐል ለለብስ ፍሌንዩት ሻምፕዮን ጅግረ ዐጃላት 2023 ነሰኦ።

እትሊ ጅግረ ፈሪቅ ዐጃላት ደንደን ናይ ውዛረት ድፊዕ እብ እሎም እፍሩይ ህለ መትጃግረት ነኣይሽ በህለት ምንተሐት 23 ሰነት ሐምዴ ለትወጅቡ ፈሪቅ እት ገብእ፡ ሻምፕዮን ዐጃላት ሰነት ዮም ዓመት ለገብእ ዐወት አማኝ ወምን ጁንዩር አወላይ ለአብሀዘ ሚሮን ምስግና ክልኤቶም ምን ፈሪቅ ደንደን ቶም። ሳልሳይ ምን ጁንዩር ለረክበ ሮቤል ግርማይመ ምን ፈሪቅ ደንደን።

ለሐልፈ ሻምፕዮናት ዐጃላት ኤረትሮፕ ምን ናስኤ ቱ?

- ሰነት 2008፡ ዳንኤል ተኽሌሃይማኖት ምን ፈሪቅ ዐጃላት አቅሊም ግብለት
- ሰነት 2011፡ ፍሬቃልሲ ደበሳይ ምን ፈሪቅ ብድረ ዐጃላት ሰምበል
- ሰነት 2012፡ ዳንኤል ተኽሌሃይማኖት ምን ፈሪቅ ዐጃላት ግሪንኤጅ



- ሰነት 2013፡ ሚሮን ተሾሚ ምን ፈሪቅ ዐጃላት አስቤኮ
- ሰነት 2014፡ አማኝኤል ገብሬአዝጋብሄር ምን ፈሪቅ ዐጃላት አስቤኮ
- ሰነት 2015፡ ናትናኤል ብርሃኔ ምን ፈሪቅ ዐጃላት ዳይሚንሽን ዳታ
- ሰነት 2016፡ ዳንኤል ተኽሌሃይማኖት ምን ፈሪቅ ዳይሚንሽን ዳታ
- ሰነት 2017፡ ሚሮን አብረሃም ምን ፈሪቅ ዐጃላት

- ሰነት 2018፡ መርሃዊ ቅዱስ ምን ፈሪቅ ዐጃላት ዳይሚንሽን ዳታ
- ሰነት 2019፡ ናትናኤል ብርሃኔ ምን ፈሪቅ ዐጃላት ኮፊድስ
- ሰነት 2021፡ ዳዊት ዮማኔ ምን ፈሪቅ ዐጃላት አስቤኮ
- ሰነት 2022፡ መርሃዊ ቅዱስ ምን ፈሪቅ ዐጃላት ኤ.ኤፍ. ኢዱኬሽን
- ሰነት 2023፡ ዐወት አማኝ ምን ፈሪቅ ዐጃላት ደንደን



እግል ረዘቆት ፈሀምኩም

□ ዕንታት አደሚ ዲብ ክል ሰነት 4,200,000 ኢነት ብርቅምጭ አው በልሽም ወዴ።

□ ማስቲክት ቀደም 300 ሰነት ቀዳምያም ውላድ ምድር አሜሪካ ላቶም ቀደሒት ህንዳያም ክም ረክበው፡ እሊ ህዩ ሐሊብ ዕጩት ሳፖዲለ (ምን ጅንስ ደዕሮ አሜሪካ)እት ማይ እንዴ ለአፈልሒ፡ ሕድ ክም ጸብጠ ክም ማስቲክ መጩሩ ነብረው።

□ እት አፋነ ለሀለ ቅደድ ጠምጠም፡ ዕምሩ 10 ምዕል ሌጠ ክም ቱ ተአምሮ ማሚ? ሐቀለ 10 ምዕል፡ ለቅደድ ጠምጠም እብ ብዕድ ቅደድ ልትበደል።

□ አሜሪካ እት እዲነ እብ እተይ ፈራውለ (ስትረው ቤሪስ)አወላይት ተ። እት ዐለም፡ ለ20 ምእታይት ምን ኩሉ እተይ ፈራውለ ምን አሜሪካ ልትረከብ።

□ እት ምዕል ሰር ልትር ምን ማይ ገሮብነ እብ ትንፋሰ ገይሰ ምኒነ። እሊ በሀለት አክለ አተንፈሰነ ገሌ ቅጠር ማይ ምን አፋነ ዲብ ሀወእ ክም ገይሱ፡ ዶል ለዲብ ነዛረትነ ነአተንፍሰ ለእንርእዩ ግዩም ለመሰል ቅጠር ለመዕ በሰር ቱ።

□ ኮዋለ ለልትበሀል ሐዋን ከደን፡ ኩሉ ረአሱ ማይ ኢሰቱ። ህቱ አቀጠፍ ቀላሚጦስ ሰበት በሌዕ፡ ለከፊ ማይ ምኑ ረክብ።

ምን ዐጃይብ ሕሳብ

ዕምርክ ከምቱ? እት ወረቀት ክተብ፡ እብ 7 አብዝሒ፡ ሐቀሃመ እብ 1,443 እትባዝሒ። ለብዘሕ (ፍገሪት) እግለ ዕምርክ ሰለስ ዶል እግል ትደጋግሙ እግልካ ቱ። እግል መሰል፡ አነ ዕምርዬ 50 ሰነት ቱ። $50 \times 7 = 350$ ----ሐቀህ ለ350 እብ1443 ክም አትባዝሐክወ፡ 505050 እግል ተሀበኒ ቱ። እሊ ህዩ፡ እግለ ዕምርዬ 3 ዶል ድጉጉም ለአርእዩ ሀለ። ዐጃይብ ረአነ ትበው ገብእ! አማንኩም ቱ፡ ዕሉም ሕሳብ ዐጃይታቱ ኢልትከለሱ።

መዲነት ሚክሲኮ ዲብ ረአስ ቅራር ሃርእ

ዓሲመት ሚክሲኮ ላተ መዲነት ሚክሲኮ፡ እት ክል ሰነት እብ 7 ኢንት ገጸ ተሐት ትትወሐል ሀሌት። ለሰቡብ ህዩ፡ ሚክሲኮ ዲብ ረአስ ዓያን ማይ ብዞሕ ብኒት ሰበት ሀሌት ክም ቱ ዑለመእ ልትሃገው።

እት ድዋራት መዲነት ሚክሲኮ፡ እግል ማይ እንዴ ትቤ ዓለ ሐፈርክ ምን ገብእ፡ ለቀዛረትለ ዓያን ሸቅል ትከለእከ። ለማይ ፈሸሸ ሌጠ ልብል። እሊ ህዩ ማይለ መዲነት ምለዐል ድሙን ክም ቱ ለአርእከ።

ሰበት እሊ መዲነት ሚክሲኮ፡ እግለ ዝያድ 15 ሚልዮን ለገብእ ሰኮነ ለኢትትከለስ ዝሕረት ማይ ለትሀይብ መዲነት ክምሰል ተ እምር ሀሌት። ገሌሁ ሽዑብ እዲነ ህዩ እብ ኢረኪብ ማይ ጽምእ እበ ለአትልህስ ትርእዩ።

ከእብሊ ቱ ገሌሁ እብ ኢረኪብ፡ ወገሌሁ እብ ኢደቂቡ ለበለው አበውነ ለላባም!

ሰር ናይክ ንትነሽዑ ጽክሲጅን ምን ጽዮ?



ሰር ናይክ እሉ ንትነሽዑ ሀወእ ነዲፍ በሀለት ጽክሲጅን፡ ምን ድበዕ አማዞን ክም ልትረከብ ብሐሳት አከደ።

ድበዕ አማዞን ሰነት እብ ግዲደ ለዘልም ምድር ገልዋት እት ገብእ፡ ዝያድ 50 ምትር መትወቃል ለቡ ዕጩይ ዐባዩ ግልቡቡ ቱ። ርሕብለ ገልዋት፡ 670 ሚልዮን ሄክታር ገብእ።



ሀለ ሰብ መቅደረት ድዋር ሸኩ። ከውላድ አዳም፡ እሊ ጽክሲጅን እሊ ባታክ ወደማር ዕጩይ አማዞን ኢበዋረ ምን ገብእ፡ አሰክ ሰነት 2030፡ ድበዕ አማዞን 27 ምእታይት ምኑ ግልሓይ እግል ኢልትረፍ ፈርሀት ሀሌት።

ከውላድ አዳም፡ እሊ ጽክሲጅን ለህይወም ለሀለ ድበዕ ደመረው ምን ገብእ፡ ሀወእ ክሶሕ እቡ እግል ኢልብደው ወዐለም አክረት በዳህ እብ እዴ-ኖሰ እግል ኢትግበእ ተአፈርህ።

10 ፍንቲት ሰወር ሕዘው



ሳድስ ወራር እብ ካርቱን

ቀዳሕ መሐቀሶ ደድ መኻ ዕርካ መገድኹ ደማን ገሊፊን ጸግል ዕድቀብ ለትቀይሃ ጌቱ ጠእጥ ጸትክጠታዩ። ደጠሁት ሻፊ ጠቃኝ ለኢን ጸት ገሊፊን ጸጥ ሰጋጸት ጸገ ጠፃፊት ሰጸት ሻሁድ ገልጸትሐዞቹ ገሌት ጸጋጸት። እክፍላግ ጸግል ሰገብደዋ ሰጦፍ ጸው ጸሊፊን ጸጥ ሰጸት ትፍጥጦ ዐጸት። ጸግል ደርጊ ህዬ ዐጸ ልፍል ሐገግ ጸቱ።



ጸፈተርየዐጸላክ

16ይት ሰነት ዕልብ 27

አርቡዕ 28 ጁን 2023

ገጽ 12